

黃成堯著

西安圍城記

傅銅題

西安圍城記目錄

吳序言一

序言二

自序

第一章 圍城之原因

第二章 難民之收容

第三章 絕糧之恐慌

第四章 人民之負擔

第五章 軍隊之騷擾

第六章 街市之慘景

第七章 守城之經過

第八章 解圍之由來

西安圍城記 目錄

一

9588

第九章 解圍後之狀況

第十章 結論

附錄西安圍城詩集目次

壯歲詩一首

圍城

百戰

石仲麟君之弟兩琴以斗米至

長安野老行

枕上成

民國十五年八月十七日糧絕

出門書所見

呈教育總長爲具陳管見擬於京師大學添設蒙藏專門部以牖邊氓而圖融化仰乞採納施行由

呈爲具陳管見擬於京師大學添設蒙藏專門部以牖邊氓而圖融化仰祈鑒核採納施行事竊維立學原以育才規制宜臻完備儲材期於致用遐邇應受陶鎔蒙藏僻處荒漠風氣閉塞讀書識字之人百不得一不特不曉漢文難期同文進化之益抑且謬識蒙藏文字更有數典忘祖之虞其子弟受學概於喇嘛廟所訓育者除梵文外惟知禮佛誦經而已於國家大勢中外情形淺近科學普通知識甚至粗淺文義茫然不解良可憫已同爲中華民族而蒙藏與腹地文野判若霄壤外化因得乘隙而入危險奚如近年蒙藏離心受人煽惑此爲唯一原因當清季世籌備憲政曾由學部編訂蒙藏興學章程嗣因籌辦不易未克實行現值五族共和人民平等籌邊政策自應採用同化主義相與提携啓淪俾得日進文明漸躋漢化此關於蒙藏教育不得不亟宜提倡者也惟蒙藏遠在邊陲語文

隔閡考其歷史習俗以及生活狀況地理關係於教育之進行固不免困難然究不能因噎廢食前清待遇蒙藏純用愚民政策考會典所載蒙藏人民不得延請漢人教讀文牘不得擅用漢文即命名亦不許輒用漢字違者治罪其禁止漢文之輸入實爲蒙藏鋼蔽所由來民國肇興此項禁令雖已無形消滅然而蒙藏人民墨守舊章終慮積習難忘且蒙古書籍異常缺乏現在流傳之印刷品僅有聖諭廣訓蒙古源流成吉思汗傳三字經三國志及其他小說數種而已求一有裨實用足以啓發知識之書殆不可得而西藏文化如天文算術醫藥等科全在喇嘛經典拘於成見進步難期故蒙藏人士除王公少數執事官吏及喇嘛等熟諳蒙藏文字外其餘通曉文義之人曾不數睹而粗識漢字者尤屬罕見窒塞聰明有同醉夢間有一二述說近事之書多屬黨人煽惑之詞不云中央如何虐待蒙藏即曰蒙藏如何遭漢人之壓制實含有宣傳作用長此離間淪胥堪虞現在漢文既不能普及蒙藏則振興蒙藏教育勢不得不由漢人學習蒙藏文字以爲入

手之方滿回二族無形同化文字功用可以想見蓋以高等文明而同化低等民族其效力之強遠邁武功要爲世界先進國所公認且收明效者其實施尤莫妙於教育至邊地教育之方針教材之選擇與師資之儲備非預有諳練邊情與教育原理之人才不爲功此京師大學所以亟宜添設蒙藏專門部者也伏查京師大學爲中央最高學府原由國立九校歸併者文理工法醫學商農以及藝術專科莫不萃於一堂當茲改組之始舉凡國家所需之材應無不容滙而鈞陶之獨於蒙藏專門部付之闕如未免遺憾且前西北大學所設蒙藏專修科係教育部核准立案祇以赤軍佔領陝西該校遂被無形解散請援西北大學之成案在京師大學增設蒙藏專門部各一班地既適中初創之規模宜備學非專設所需之經費無多此項專科只歸二三教授擔任月薪不過數百元其他學科均由本校各項教授兼任較從先專設之蒙藏專門殖邊學校等所省不甚多乎延攬蒙藏專門人才以任教授之責在京尙不甚難時弗可失稍縱卽逝擬懇俯如所請樹

之風聲將見變榛莠爲昌明化離携爲愜洽博我皇道儼若重譯之來賓宏我漢京預卜同軌之畢至成此粗通蒙文略諳蒙情歷在蒙邊各署任事有年且在國立西北大學担任蒙文教授三年於邊地情形多所目擊敢就夙昔意見貢獻芻議伏乞

鑒核採納施行謹呈

教育總長劉

中華民國十六年九月

日

呈參謀次長爲具陳管見擬藉文字融洽漢蒙感情請鑒核採納施行由

呈爲具陳管見擬藉文字融洽漢蒙感情仰祈

鑒核採納施行事竊維籌邊之策不一而其要莫切於羈縻羈縻之術亦不一而其用莫善於文字誠以文字者詞達理明賢愚皆知觀感家絃戶誦婦孺盡可聞知昔漢文帝與書南粵蠻夷大長削號稱臣唐德宗下詔奉天武夫悍卒揮涕感

激以彼妄自尊大素號跋扈者流皆賴文字以激發其天良消弭其戾氣由於感人者深故其收效者大是則前人之事後人之師也況漢蒙本屬一家親善已非一世徒以倨近日俄受其蠱惑以致外蒙獨立實爲中國隱憂此不得不亟宜設法挽回使我金甌無缺上分宵旰之憂勤下盡靖共之職責敢抒管見用瀆

鈞聰成堉前在西北大學擔任蒙文講席暇輒著述蒙文亟思以文字聯絡漢蒙

之感情深爲蒙人所悅服雖有著述蒙人鈔寫殆徧而無印本流傳每恨風行不廣則溝通漢蒙文化聯絡漢蒙感情之夙願終未盡償現在外蒙獨立尙未撤銷內蒙與漢人之感情不及曩時融洽若以武力解決恐難見諸事實如果因循放棄則內而黨人覬覦外而強鄰窺伺離間日久收撫愈難成堉睹茲險象深抱杞憂不揣譎陋爰著漢蒙親書真諦一書欲播遐荒藉文字以通款曲惟是成堉力薄久未刊行請將此書由公家出資印成漢蒙合璧單行本作爲私人著作之贈送不用正式公文之手續以避其誤爲政府宣傳之品即無形以堅其信仰之忱

似此辦法所費無多收效當易迨至傳播漸廣成效愈著內外蒙古心理相同苟內蒙因此堅附則此種親善真諦勢必藉內蒙爲驛使以輸入於外蒙再爲立說宣布中央德意期望外蒙之歸心當非難事蓋文德入人之深感人_之速較武功尤爲宏偉而久長也成堉一介書生謬蒙知遇既荷

拔擢之鴻施敢忘涓埃之細報所有擬藉文字融洽漢蒙感情各緣由是否有當理合具陳 鑒核採納施行謹呈

部長于 附呈漢蒙親善真諦一書

西安圍城記序

長安居民二十萬死於丙寅之役者三之一自民國以來殘民以逞之事史不絕書無如此役之慘且甚矣著者與我皆此劫餘之人當其糝糠不飽犬馬皆烹棲然相對不知死期之在何日既勢有可死而終不至於死者非天之默佑吾人爲獨厚哉夫死者已矣死者之含冤地下則未已也著者與我既親見吾民之枉死無告吾不爲之紀載昭雪以訴之天下後世則吾之幸得苟生爲虛逝而可愧著者今於痛定之餘追思往事瀝其血淚發爲文詞雖自慶生還不忘長安如此可謂能盡師儒之責者矣抑思是非以偏蔽不明毀譽惟折衷所試長安之役攻者守者其罪惟均攻者謂守者爲陝匪而守者亦以嵩匪呼之跡其所爲等匪耳倘非來者解厄之力則著者與我不爲長安枯骨者幾何是以賊吾民者誅伐無所忌德吾民者謳歌而不嫌也丁卯四月弟碧柳吳芳吉序於東北大學


序

丙寅西安之役圍城八閱月余友黃君春田時任西北大學教授適丁此厄及其妻孥得免於危者一間耳今春生還至京述及前事猶惴惴焉語弗能詳走筆書之得十章命曰西安圍城記用酬注意茲事者屬余序其端受而讀之繪形危亂以愴以悽雖不免涉及其時兩軍之短長而自信無左右袒即毋庸避忌迴護以存其真異日史氏或從而采之歟方西安之圍急也武昌亦圍守四旬援絕而陷居民已食盡糠覈饑殍相屬以視西安之創鉅痛深不及什一也然其人痛定之餘懲前毖後無術弭亂遂倡議墮城以祛後患當路憐而許之何不聞西安之人有是議耶某軍事學家言城高池深古稱地利故春秋書城部所以備邾書城虎牢所以偪鄭今則火器之烈無堅非摧城郭之爲用可備寇盜之出入曷能當戰爭之捍禦苟警察足以詰奸捕盜者夷其城可也是說也余於京城近年迭堵潰兵信可徵矣於西安被圍八月而無恙則滋惑焉余更思之某軍事學家之言其常也西安之事或其變歟且城之存廢必視其警察之完否斯時四境不甯鄉鄙

之氓類多避居於都邑非賴其緜警之衛護賴此城堡耳若冒然遽議墮之一旦
萑苻告警其何以備守望矧其時大同之役晉軍固守堅城西北軍鏖戰其間竟
不能得志於河東又昭昭在人耳目西安之人未和武昌之議者意在斯乎雖然
辛亥以還內亂相尋兵燹之域有非出於圍城環攻而其殘慘可作如是觀者其
初猶剝那起滅於一隅也近則累年禍結擾攘徧寰區庶民失業羣盜如毛哀我
無告之窮黎身膏鋒鏑者無論矣其困於徵調轉輸虜掠流亡以委溝壑者何可
勝數其存者亦惟日呻吟於水深火熱而無逃避喘息之處茫茫禹域我安適歸
何莫非陷圍之西安西安其具體而微耳詩云兄弟鬩于牆外禦其侮彼各國間
尙謀議削減軍備永保和平我遙遙黃炎之胄性非至愚亦無深仇夙讐而忍長
動干戈於邦內乎况當鄰兵壓境國本耗斁之時毋寧息意氣之爭從容論議定
邦家正人心省苛繇厚生殖長子孫內治則外安所保全者豈僅一城一地哉儻
國之君子大澈大悟以共圖之則著者茲編庶乎不爲苟作也夫

西安園城記 序

丁卯夏四月弟甲峯蕭颺曾序於燕京




自序

溯十三年八月受國立西北大學蒙文教授之聘將赴西安吾三兄序東臨別贈言曰我輩刻苦殫精以深研蒙古文學者其志將以蒙事爲己任非藉此授徒以圖舖啜也雖然蒙古事業斷非一手一足之所能任昔者羅羅山等講學湘中一時人才稱盛共成清室中興之偉業今日欲講籌邊則邊才之儲備正吾人首先之責任矧當此時外蒙尙未收撫內蒙各盟旗又有日俄浪人及外蒙黨人種種煽惑而離間之邊局前途之危有心者靡不厯慮設不從事蒙古教育則內地人民與蒙古士庶言文既易隔闕即無外間而感情亦難聯絡至邊事人才之消乏更無待論矣弟此行須於訓練學生培成全材以期將來效用外並宜多事蒙文著述以爲溝通漢蒙文化之基礎而結精神上高尚之感情其爲功不在當事者下矣此不惟國家之榮光抑亦蓬門之寵幸予深韙之到校後即遵兄訓慇懃教職一面從事譯述著有漢蒙親善真諦一書以融洽雙方之情誼編漢蒙字典以

備漢文譯蒙文之參考他若蒙文文法蒙文會話莫不積帙成篇並譯古文二百餘篇此外擬著之書尙多惜爲事實障礙不得已而中止倘再假我數年自信蒙文之著述必益增多學生之成績必較有可觀者矣乃越二年劉鎮華突圍西安經八閱月之久而始解圍其間艱難險阻可謂備嘗而槍林彈雨之際絃歌未嘗中輟此則差堪自慰者及城圍既解後之來者取消西大改辦中山學院內設軍事政治黨務組織農民運動三班舊日西大師生遂無形瓦解時駐陝總司令于右任及中山學院籌備委員劉瀚章等一再面約繼任教授尙擬擴充蒙文專修科一班予以秦中彫敝之餘求生不遑且未厭金革誰言學問於是決然東歸今茲所錄西安圍城之事實皆就予所確知而記憶者合爲十章都三萬餘言舉凡圍城之始末軍隊之動作人民之困苦社會之狀況莫不殫述其非予所及知者則從略焉友人見而許之慇懃付梓以公諸世俾全國人士皆知西安圍城爲古今未有之奇災浩劫而軍閥之病國殃民爲何如也予笑而頷之然予之初志未

能多所成就雖時勢迫然亦我生之不辰負疚良多謹誌其緣起如此
中華民國十六年四月二十日奉天黃成堯自識

西安圍城記 自序



西安圍城記

奉天本溪黃成

第一章 圍城之原因

丙寅春間國民第二軍在豫失敗吳佩孚任命劉鎮華爲豫陝甘剿匪軍總司令率鎮嵩軍十二萬人由函谷關長驅入陝不數月間克潼關下二華佔渭南據臨潼勢如破竹氣吞三秦時陝西軍務督辦李雲龍國民二軍第十師師長馮玉祥之幹將也新由河南脫險歸來城內駐軍僅有劉一敬一旅及衛定一師之數營統計不過三千人劉如率師逕入唾手可得西安戰事即可告終圍城慘劇不至開幕矣乃劉鎮華忽於攻下臨潼後調其基本隊柴雲陞部爲前鋒將攻城極稱得力而毫無紀律之麻振武部調至後方以爲入城後不至騷擾地方其愛護商民之心可謂周至於時陝西耆老如宋伯魯宋聯奎黃兆麟寇卓等又組織和平期成會不願雙方兵戎相見以免人民受莫大之痛苦曾向雙方提出條件要求劉軍暫勿進城李軍自行退出在李將出城劉未進城之間所有省城治安由陝

西耆老責成警察擔任維持劉鎮華以陝西耆老既能擔保李雲龍讓出省城則兵不血刃而得堅城且爲政不得罪於巨室自宜允如所請藉博耆老之歡心間接卽以得全陝之民心得民者昌失民者亡劉欲作陝西督辦收拾陝人之心能不贊成耆老組織之和平會乎加以陝西南部之吳新田已與劉始終合作北部之井岳秀亦持中立態度此外有援李之實力者惟楊愷耳而楊李又夙不一致以是種種原因劉鎮華遂全部承認和平會之提議矣竊思此種和平會其作用本極微弱設雙方有一中變者將無實力以制止於其間也果也李雲龍別有心腸以環境情形惡劣個人無法撐持即佯爲表示下野將所有軍權交其參謀長韓綰青代理其下野之宣言有謂不忍以一人之去就牽動全省之安危祇要桑梓不遭塗炭個人一切權利皆可犧牲其態度之光明正大爲何如耶乃一面促耆老組織之和平會進行和議利用此舉以爲緩兵之計一面派遣幹員潛赴河北運動楊愷援省許以子彈軍費隨時撥付省內軍政財政一切悉聽主持寧讓

楊而不讓劉也楊愨本係綠林渠魁河北地皮剝削已盡無如部屬人數過多給養頗難支持忽有李雲龍求援之機會當然樂從蓋功成則陝西督辦自優爲之卽使失敗而省城之子女玉帛予取予求尙不失爲富家翁也於是卽下動員令國民第三軍第三師之第一補充旅長姬匯百於陰歷三月四日率其本旅兵士由北門開進省城次日第三師之第六旅旅長馮欽哉及陝北國民軍第一游擊支隊司令黑憲章先後奉楊愨之命率部晉省楊氏本人亦抵省垣與李雲龍磋商結果李雲龍守南門衛定一守西門楊之第六旅及黑支隊守東門姬匯百旅及第五旅之第九團守北門佈置就緒和平之議殆如大風飄去而戰雲遂密罩全城矣西安省城自陰歷正月初間卽已風聲鶴唳人心惶惶不克終日軍事僅有旅長姜宏謨負責其後李雲龍僑裝回省人心賴以稍定自聞臨潼失守則又驚慌失措如大難之將臨殷商巨富均於其門庭預備窖藏金銀及糧食之地以保財物而備饑荒甚有棄其高樓大廈而移寓陋巷以示貧無所有者懼劫掠意

至苦也貧者則奔走號呼紛向親友告貸籌備三數日之米麵燃料等必需品以防絕糧斷炊至一般鋪戶挖土坑也壘假壁也以埋藏其銀錢及貨品資本殷實者尤高築其牆垣嚴鑰其門戶經理者早覓相當之處所矣予客籍人携眷來此爲時不逾二載人地生疎殊無可依恃之親友而學校當局又以校款維艱託辭他適學校既無正式負責之人所指充校費之捲煙特稅又無按日征收之款已欠薪三月未發欲多購米麵存儲而無許多之存款殆已瀕於絕境只可略仿貧民之策購備七日之糧不至受餓而已一般人士不知李楊結合之內幕僉以和平可期縱使無望亦不過圍城一二日勝負即可立見吾輩即可由危險之期轉入安全之域矣證以幼年在奉讀書植端陽節北大營兵變一夜之間即已風平浪息今既備糧七日在予度之至爲安全而孰知有大謬不然者

四月十七日即陰歷三月初五日天未破曉在臥榻中突聞砲聲隆隆槍彈如雨細聆其聲由遠至邇知爲劉軍由十里鋪漸漸攻城將抵東郭門外也遂即披衣

正襟危坐並促妻孥勿再酣睡秉燭待旦如度新年而中心志忑澈夜無眠非不知睡不敢睡也同院住戶無論男女莫不如斯足見人同此心心同此理及東方既白紅日東升槍聲寂然不勝其沈悶欲睹外間之狀況恐遭意外之危險乃由後門翹首東望見二二三兵士荷槍實彈兇氣迫人由蓬門華戶中搶出被褥二三具持赴火線並高唱其秦腔竟無絲毫懼色予覩此狀既惡其毫無紀律而又壯其膽大不怕死陝西軍隊大都類此若加訓練可成勁旅飯後丁君明德保君至善聯袂而來詢其昨夜戰況亦無所聞不過在街上見有傷兵及陣亡之士兵與血淋淋之棺柩而已予恐被褥爲兵所搶不免受凍特請丁保二君將予之行囊持赴學校二三具以備意外陝軍雖不講紀律然知學校清苦尚可保全也少頃予亦至市探望果見司令部通告言昨夜戰況我方奪獲槍彈若干殺敵若干俘虜若干片面報勝固不可信然劉軍確未攻入城門守城者居高臨下射擊極易且有城堞爲之掩護見有挺身登城者卽飽以彈丸傷亡之數自然攻多守寡何

疑之有

甫閱通告畢卽聞軍士拉夫之吶喊聲及苦力求饒之哀告聲人聲嘈雜不辨爲何最後忽聞砰拍之聲疊疊而起卽軍士怒苦力之不願從役力批其兩頰予因疾馳而去蓋軍隊在街市拉夫往城外挖掘戰壕人民知有危險哀請釋放而受撻也晚間紅日西沈甫燃燈而槍聲又作有時大砲轟轟連續不斷有時砲聲甫息密集槍彈又如暴雨其聲激烈其勢岌岌似已進城者俄而槍聲漸遠遂渺然無聞蓋兵已臨城下又被擊退也翌晨槍聲闐然予卽赴校見街上行人尙未完全斷絕不過比較常日稍見減少知命者不立於巖牆之下值此槍林彈雨孰肯挺而走險惟吾儕執教鞭者受人薪脩爲職所限不願輟止工作仍按時上課而已將及校門而槍聲又作且極猛烈予卽疾馳由兩旁街門繞入校內槍聲向南發則沿道北馳向北發則沿南面而馳及進講室喘息尙未定學生到者寥寥無心聽講人人不安授課亦屬勉強予乃與學生約三事（一）槍聲激烈時停止

上課（二）到講堂後槍聲激烈得隨時散課（三）若散課不爲事勢上所許應即同伏地下以免危險是日課畢至教員院適同人皆在此會議修築地洞以避砲彈予亦贊同不數日間即於後院掘成三洞互相聯絡以爲有避難之處及求生之地矣孰知此項地洞殊不適用蓋以洞距臥室均有四五十步當砲聲連連不斷時莫敢前去故也如於臥室內掘一地洞尙可避彈吾人應注意者砲彈橫飛宜在屋外不宜在屋內磚牆亦可避槍彈自吾校發起地洞後商民住戶仿行者亦頗不少其爲效亦僅矣

鎮嵩軍初圍城時戰爭非常激烈往往攻至城下甚或竟攀登城上又被擊回攻擊與抵禦各竭其死力以赴之以致流彈傷人未能或免其傷人之處予尙可約略記之（一）東大街端履門一車夫正由東門拉座向鐘樓行走突由東面來一流彈將渠擊傷身死（二）驛馬市一賣菜者擔挑小販沿街喊賣適中流彈身死（三）某老人因城圍日久無法維持曾手持舊衣赴黑市販賣適無售主

快快而歸行至東大街突來一流彈中入磚牆折回傷及該老人腦部腦漿迸出登時身死（四）小差市某姓之小孩兄弟二人大者七八歲小者四五歲正在街上玩耍突來砲彈將該兄弟二人一併炸傷尸骨無存（五）某媪住中柳巷突於飛機擲炸彈時身立院中炸彈跌落炸死無尸（六）東五道巷某媪以洗衣爲業某日正在院內洗衣突中流彈身死（七）紅埠街某姓之小孩未週歲正在炕上眠睡其母正爲之撫背突由窗外飛入流彈中腰身死（八）南院門某鋪學徒正開門外出迎面一彈飛來身死（九）西大學生曾君人傑臥室棹椅靠窗牀鋪面窗棹旁尙有一煤油空筒曾君坐椅看書突來一彈由棹面穿過煤油筒直落在牀上幸無損失設使曾君臥牀未起不亦中彈而亡乎聞吾校其他學生臥室內飛入流彈者頗多均幸無恙以上九條係就吾所親見親聞者而言其餘尙多然在城內總計不過二三十人誠不爲多一則城高二則房舍櫛比以故傷人甚少惟難民出城中流彈而死者不可勝數茲不具述後當詳敘在後

數月之間鎮嵩軍改變戰略完全取圍困之勢不急急於攻城攻亦不烈故無流彈傷人之事再鎮嵩軍自三月五日圍城直至十月二十四日解圍共計圍城七個月又二十日在此期間鎮嵩軍迫擊砲彈落入城內者不知若干萬發飛機拋擲炸彈及重七十斤之砲彈落街市者二三次幸均未爆裂誠西安人民不幸中之一幸假如七十斤之砲彈逐個爆發則西安城內早成齏粉人民亦早已靡遺矣又如解決迅速戰事不若是延長則圍城餓殍或不至數萬人之多嗟呼陝民何辜罹此浩劫真令人不堪回首矣

人當生命危險時反不知恐懼事後追思爲之慄然諺云過後怕者誠然誠然夏季予將眷屬移入學校某夜砲聲與槍聲均極猛烈同事均已披衣而起不敢高臥予亦以室內非常危險在臥室牆外站立片刻倏有槍彈掠予頭部而過落至面前觸磚地其聲鏗然予俯拾視之脫殼之子母顆也假使中予頭部早已嗚呼矣七月初間因絕糧將赴廣仁寺陳浪洲兄處告貸欲專函奉懇恐其藉故推諉

縱不推諉煩渠親身送來則渠已年近七十倘於中途遭逢意外我將何顏以對友朋於是決計親往既至西五台地方離吾校七八里距廣仁寺方一里耳驟聞槍砲聲齊作其子母彈由予左肩過者有之由予右肩過者有之落予前面者有之落予後面者亦有一若城外劉軍發彈有意與予惡作劇者值斯時也歸與歸與則絕糧是虞行兮行兮則中彈可慮再四籌思不幸中彈僅死一人一旦絕糧則殃及妻子寧前進勿後退也遂鼓勇前行及抵廣仁寺詢悉今日省軍攻大白楊不利致有此激烈之戰爭及予回時槍聲猶未息也迺今思之不寒而慄

第二章 難民之收容

當鎮嵩軍之初圍城也治軍無嚴明之紀律士卒懷報復之私心蓋去歲二軍李雲龍在豫西一帶焚淫搶掠有甚於匪故此大鎮嵩軍重入陝西沿途騷擾以圖洩忿甚有無知士卒到處姦淫婦女以事報復至若強佔民房劫取民財催糧派捐強拉民夫築造戰壕猶其餘事軍官既不嚴加約束軍士愈肆無忌憚沿西安

省城附近二十里以內人民聞風逃入省城者紛如也及戰事開始後鄉民入城逃難者尤日多一日其到鎮嵩軍戰壕必須檢查一次遇有携帶米麥及銀錢衣物者一律扣留婦女稍有姿色者輒被兵士拉入戰壕遂其獸慾至少亦須扣留一二夜始可釋放及出壕而已與其父母兄弟妻子離散矣入城後省軍又從多方留難再三搜檢甚至婦女纏足之布均須解開一看拘聚難民至千數百人始請命於李楊二司令經其許可方能進城有親友者固得所依附否則祇可往投難民收容所以爲棲身之地

幸當時圍城未久米麵尙未十分漲價銀每元可買米二十四斤麵二十七斤省城慈善團體如西安紅十字會陝西佛教會濟公慈善會中華聖公會文教會天主堂基督教浸禮會均設難民收容所共計八九十處收容難民達六萬餘人每人一日發饅首一斤小兒減半各界人士亦皆傾囊捐助惟人數過多需款浩繁頗難爲繼及陰歷七月間城圍已四閱月矣每銀一元祇能買米麵六七斤城內

人民因城圍日久生活困難投蓮花池及懸樑自盡者日必數起難民收容所既無外間捐款亦即不能永久維持故發給難民口糧之數因以遞減每人由一斤而十四兩十二兩以至半斤祇獲半飽又以難民收容所多就各省會館及各公共處所改設人多房少擁擠不堪又值疫氣流行難民之中十有八九患病幸而流行日淺傷亡無多然終日不飽面有饑色沿街行乞者不可勝計小孩項懸金鎖銀鎖而向人乞數兩饑者比比皆是

省城各慈善機關有鑒及此與其醫集如許難民困死城中無寧縱其謀生於外且可節約城內糧食之消耗特推青年會總幹事張亞雄及天主堂丁神父之代表路思二君出城向劉軍辦理難民出城交涉事宜自張路二君出城後一般人士之心理僉謂劉氏爲人道計必允開放難民出城或預定時日或嚴加限制耳孰知竟有大謬不然者張路二君回城交涉毫無效果及八月初間每元僅買米麵二斤難民生活愈難維持與其坐斃曷若挺而走險或可苟全乃千百成羣聯

袂突圍出城有無危險均非所計祇視所遇兵士優劣何如而聽諸命運耳劉軍之中亦有優良份子見城內逃出難民情狀至爲可憫有啖以米麵以濟其饑稍一檢查卽行放過者有多方留難種種搜檢遇有銀錢及珍貴衣物輒携之以去及剝削殆盡始行放過者復有索賄留在戰壕經五六晝夜而仍不放過者則最劣分子也直至八月中旬難民始行全數出城非一次也乃陸續放之

先是難民出城後卽赴劉軍團旅部展轉託人賄以金錢報告城內有其親屬若干人經其許可發予執照方可派人赴城內迎接守城兵士見之亦以鄉民迎其親屬出城並無間諜情形亦卽放出放入因此專作此項營業者頗不乏人每引一人出城輒索五六元之賄半給劉之兵士而自得其半焉城內人士因鄉間有親友來引得以出城者亦屬不少惟學生原裝出城守城兵見之自不留難一至劉軍戰壕卽行開槍威嚇吾校學生詹熙安等出城數次且到劉軍戰壕與其官長再三交涉均無絲毫通融之餘地惟以西北大學係劉鎮華所創辦尙無加害

之事惟不放過耳。嗣後學生亦皆易其裝束，佯爲難民，矇混出城。丁君明德予之得意學生也。城圍日久，商舖均已停業。予曾邀其在寓共餐，始則尙備廚役，其後以食料日昂，連此一介廚夫亦行裁去。予向廣仁寺借麥五斗，寇錫三借米二斗，每日祇喝稀粥二次，佐以醬菜而已。丁君亦不辭勞瘁，共同操作，復於院內魚甕之下，挖尺深之地，窖藏米斗餘，均係深夜時將院門緊閉，予與丁君合作而成。蓋恐被人聞知，報告軍隊來強劫也。

其後丁君見我食糧缺乏，屢欲出城，予恐其蹈險，頻阻撓之。丁不聽，曰：生果出城，當設法向劉軍交涉。放先生及諸同學出城，不愈於坐以待斃乎？竟於某夜著襪衣，僑難民在戰壕宿。二夜卽被放出城外矣。及丁到十里鋪，託劉之秘書張辛南君向劉鎮華求放。西大師生劉曰：西安予之故舊多矣，豈僅一西大哉？不便以私人開例。蓋劉自攻城不利，遂變更其計劃，取久困主義，不即猛烈攻城前已言之。每日早晚向空中射擊四五槍，以示其圍城之兵尙未撤退耳。在彼之心，以爲城

內食料有限人愈多食料愈易告竭若放百姓出城騰出食料足敷軍隊十年之用豈非須困十年乎以爭一人之督辦而不顧全城數十萬人民之生命如此居心尙可問耶張辛南原爲西大籌備員之一曾任西大講師與西大師生不無關係見其如此答覆心中至爲不豫然亦難強劉必從只好靜候時機耳

不數日間果有天主堂之外國牧師請劉鎮華放出該堂所立女學之師生劉以媚外心切不便開罪外人遂允其請予以執照吾同事之張君遂乘機再與劉交涉劉以既放外人之學生即無詞再拒西大之師生遂允之張即遣人進城至西大尋王來庭及蔡亮工等二三人實則令西大全校師生出城也乃送信者到校後祇言劉督軍之張秘書請蔡先生出城並未談及別人其時予出城之意尙未決定且附屬出城終不免冒險遂亦怏然置之惟囑蔡君出城後設法引出吾儕耳時陰歷八月二十四日也蔡亦信人第五日果遣人入城通知全校師生出城吾計始決將衣箱及書籍交寄物室存儲至傢俱及零碎物件則託劉庶務保管

既已決定出城存米亦無所用贈與同鄉楊夫人以爲必能出城故無吝惜之必要且恐城門崗兵勒索留難也

遂卽公同要求王代校長面懇李雲龍派一副官護送出城誠如此也豈不安全卽使出城不得已而行乞亦不至終日不飽以草根青菜爲代飯之資也乃有文牘員陳某者江蘇人居心叵測告引路者曰汝知今日出城果安全乎曰劉有命令放西大師生若城內守軍無問題一入劉軍戰壕卽可無恙陳曰城內有李總司令所派副官護送出城自無問題詎引路鄉民突聞有李派副官護送之言大爲震恐以爲彼如知予爲引路者必以敵軍偵探見疑吾其不保首領乎遂卽詭辭外出從此卽不見此人之蹤影矣西大師生聚集一堂專候出城李之副官亦在校內鵠候多時而引路者音信渺然同人等紛紛議論有主張不待引路逕行出城者有主張慎重將事勿過冒昧致蹈危險者結果贊成穩健者居多祇得暫候詎料引路之人從此絕跡於西大之門而吾儕生命殆有餓斃之虞矣陳亦出

城之一分子何爲而出此言殊令人難以揣度

予之食糧既已贈給同鄉所存無多不得已而冒險赴廣仁寺運糧事詳第三章茲不贅述其後接濟予糧之陳浪洲兄存糧十三石在木炕內被駐軍查覺全數搜去亦陷絕糧之厄予不得已每日晨携包袱赴黑市作賣估衣之生涯此時一般人士經濟充裕者不敢買物恐自炫其財卽召難測之禍貧乏者度命不遑更何能買我之破爛綢衣也向余問津者無非挾持匣槍之馬弁護兵搜括搶劫得來不義之財因出賤價而購買之然在吾儕於日暮途窮之際尙有多數丘八爲我檢拾破爛得以易糧而歸實不啻濟我之急拯我之危可稱一飯之恩也惜於應酬買主之際餓不能與無如許精神問其姓字也但知其著紅帽籬者爲楊懿之兵平常軍帽者爲李雲龍之兵耳值十元者僅賣二元買麵不足半斤五口之家難得一飽夫以大學在職教授而至鬻衣以餬口尙難充饑吾何慚焉吾重爲國家前途悲耳

及城圍解後學校對於教員之生活仍不維持典衣已成空篋歸路又怯行囊躑躅長安之市如犬喪家出入窮校之門猶魚在釜果咎由自取歟此次醜聚資斧重入都門雖供職窮局薪俸不繼以視長安被圍呼天不應求人無援者其精神上之甘苦安危奚啻霄壤陰歷九月二十間聞道路傳言有謂二十四日大放者予於斯日襁負幼子携長男步行六七里果見出城逃生者夾道疾馳爲數不下五六萬人扶老携幼引男帶女塞滿途中及抵南郭門卽見折回之人多於渡江之鯽且有死屍及受傷之人抬回者絡繹不絕詢之始知被劉軍彈傷不准一人出城予亦折回不復作出城之想當時卽買油渣一塊以充無上食品一家數口竟賴油渣得以延命今日顧不幸歟

第三章 食糧之恐慌

城中存糧有限解圍尙屬無期餓殍載途居民無不瀕於悲境予之食糧將生問題不出五日卽將流爲街上餓殍矣爲苟延殘喘計不得不呼號求助於故舊之

門顧客中故舊無多況在難中熱腸有幾回憶向之聘我來陝者今已回京矣留我續任教授者亦因校款進行遁跡南京矣膺代理之責者雖屬博學鴻儒道德高尚然於城圍日久之際竭其能力亦不過活動糧米一二石分與吾儕者一斗穀子耳一斗粟五人食之能持幾日陳浪洲兄屢次遣人送錢給吾或五元或十元至再至三患難相顧真可謂生死肉骨矣此時糧米已成無價之寶金錢幾乎失其效方向之可買五斗者今則僅買一二斤耳

予聞鬼市賣衣物以餬口者日以數千計予亦擬携衣赴市及行至鬼市不期而與浪洲相遇渠見吾此種情形頗爲惻然泫然流涕曰予寺中存糧已盡僧衆皆以榆樹葉爲餬口之資已多日矣實無通融餘地惟爾我至契萬無坐視之理實以相告予臥室尙藏有黏穀二三斗原爲自保殘生者今與君分之將來糧食告竭與君同餓可也宜勻作數次搬運不宜敗露使人知我存穀將遭抄家之禍予聆其言感極涕零不顧賣衣草草收拾欲卽往取陳君曰不可與吾同行恐啓

他人之疑明晨秘密前來勿爲外人道也翌日天甫曙予卽如約携包裹一具繫繫腰間步行一小時許始抵廣仁寺駐守該寺之兵士問予來此何事將見何人予低首下心告以本寺陳達啦嘛係予同鄉多日不晤特來探訪耳幸該兵放過直入陳室浪洲見予至遂緊閉房門如惟恐人知也者忙令其徒孫爲予盛穀盛畢又爲予纏於腰間審視至再始曰無恙但微聲告予曰出門經過衛兵時宜大膽勿畏縮露破綻若被盤詰則敗矣明日勿來問一日可耳庶不令人注意囑咐已畢始開門命其徒孫送予不敢躬自送也

予出大門經過門崗時亦作昂然之態途中誦正氣歌以壓心中忐忑之氣途中雖遇三五兵士幸未盤詰予得安然到家及第三次往取陳云黏穀已罄請爲搜麥少許儘量搬取可一不可再也予前後取穀凡二次爲數不過三升所云已罄者其徒吝不之與藉此以搪塞我耳惟浪洲與予之感情有非外人所能離間者故不給黏穀而給小麥遂卽出囊盛麥三升向之運二次者今作一次運矣予來

時恐被軍隊威劫會盛服以往冀彼知吾爲軍政界人不加搜查果又平安回校於是向人借杵臼春之終日不足一餐

聞教育會內有手磨一具曾託楊勵三君商請暫借一用竟以並無手磨答覆是有穀麥仍須連皮帶殼食也又聞精業公司有磨房其院落深邃軍隊無從而入非常安全祇須有熟人介紹方能借磨予謔俄人希司托克夫與精業公司相熟遂託希爲先容並同希君至該公司商洽妥協即回校携妻及子予腰間繫繫包袱裹穀升餘手携小皮箱一盛穀二三升吾妻於手巾內盛穀一升緩步以行路上行人見之僉謂赴鬼市賣衣物者決不意予爲磨麵者予以是得安然到磨房矣予妻在內磨麵予又往返搬運數次始行告竣予此次磨麵一斗有半以市價估之當在二百元左右故非常謹慎惟恐其有萬一之虞也姬滙百旅長捐給吾校穀子一石分給予一斗因念磨礱匪易遂即連同廣仁寺取來之黏穀一併磨之計共得麵三十餘斤因西安之斗每斗重二十二斤姬旅捐給之穀每斗僅十

七斤其短少原因是否學校經手人員剋扣殊屬疑問以三十斤之穀麵作一月之食料每日兩餐五口人僅用一斤如何能飽

西北大學院內空地頗多如操場及圖書館後青草野菜如冬葵洋鐵葉之屬遍地皆是圍城半載後貧民卽以草根爲救命之物又半月間卽衣冠楚楚者亦赴予校採草而食予此時亦不上課頗有餘暇携筐提籠俯首而採須臾卽盈回室傾出又來採擷如斯者屢雖所採之青草野菜堆積如山然一經入水沸之則盈筐之菜約得一盃左右所採亦僅夠吃耳五口之家煮菜一釜所下之米僅一小杯予妻恒以菜勺揀米粒餵予之幼女因予女之乳母已於數月前以不發工資辭而他就矣夫以一杯米煮出之飯再經一度揀擇其所餘者青草野菜已耳饑易爲食啖之亦能果腹不過轉瞬卽饑有時引觴自酌以耐饑餓有時沖飲煉乳以代飲食終日昏沈煩悶亦不知饑與飽也當此之時市上凡飲食品其價無不繼長增高惟白酒每銀一元可購五斤一人飲之可持五日以是飲酒之人亦日

見增多而滿街上亦惟有沽酒者矣酒果能飽人乎不能也不過一入醉鄉便可消愁忘食耳青草野菜用以代飯苦矣哉然而城圍八月時屆隆冬青草蕪矣野菜枯矣餓斃之人數達二二萬

乃聞友人言豆醬及醬菜均可代飯予初尚不深信後如其言而試之果能充饑蓋豆醬原爲黃豆所造去其鹹汁即還爲黃豆辦仍爲五穀之一醬菜亦爲青菜所造用冷水浸三五日鹽味既除仍青菜也煮之雜以糖其效用與米麵實無以異有此等菜充滿腹中再飲之以煉乳雖不粒食亦可無恙煉乳在平日每瓶售八角及城圍半載後一仍舊價毫未之漲蓋自中等社會以下尚不知其可以代飯充饑也予初購二三瓶二星期後即已用罄其後食糧已盡乳價漸增服之者亦日益多予於此時急借洋十數元購煉乳一打以備絕糧時純粹藉此充饑及城圍解後予尚存有煉乳五瓶

以上所述青草也野菜也穀麵也煉乳也豆醬也醬菜也入口尚不甚苦作法亦

不甚難服之亦無大害乃尙有入口苦作法難服之大害衛生者其物唯何卽穀糠麥麩油渣三種是也夫穀糠以之喂肥豬尙覺不可况人類乎麥麩僅可以飼畜馬亦非吾人所可代飯者至油渣爲用與肥料無異化磽瘠之地爲肥腴之田者也今不幸而充西安人民全數食品吾儕執教鞭於他鄉者亦於千載不遇而備嘗之矣穀糠麥麩及油渣性皆不粘非和以麵不可於此米珠薪桂之際何處覓得白麵一撮直與油渣搏成一團耳穀糠麥麩係由磨房覓人專購立時卽可蒸食惟油渣則不然既費力而又勞神請言其作法

油渣如豆餅之塊其質堅硬先以斧破碎之浸水中逾數日始入釜煮之三四沸後須以毛巾瀝其穢水再入釜炒乾炒出之後和以糖蜜方可稍去其苦澀之味惟貧人無力購糖乾食之既極澀苦自難下咽勉強下咽腸胃爲之窒碍大小便恒不通暢至有大便流血因以致疾者且作一度油渣非終日莫辦結果如斯豈非苦中苦耶油渣每塊重者六十斤輕者三十斤初售五角而無人過問最後五

十元一塊而購者爭先恐後輾轉託人始可購得此項油渣皆係商店存儲經駐紮軍隊任意拍賣莫之敢問甚至商人自食亦須與軍隊先行交款而後取渣其壟斷食物橫暴如此可恨孰甚至金針木耳鮑魚海參等品亦與穀糠麸渣同其價值向之作菜者今皆當飯矣惟此項精細食料皆爲軍隊所把持不易流至民間耳

第四章 人民之負擔

吾親愛之陝西同胞尙記西安圍城之痛史乎十五年四月十七日圍城直至十一月二十七日解圍計圍七個月又二十日需用軍費名爲二百萬其實豈止二千萬乎驗契稅鋪戶捐富戶捐門牌捐公家代收房租派糧助餉此明捐也名目煩苛不可殫述若夫雜差之支應胥役之勒索軍隊之騷擾楊彪之綁票爲數之鉅害人之深是誠古今所未有中外所罕見雖著匪劇盜其敲精吸髓之伎倆亦恐無以復加吾其爲諸君一申述之

夫李雲龍楊懿同爲陝西人西安其桑梓也爲個人爭權利竟殃及全城人民使其受莫大之痛苦最鉅之慘災劉鎮華固屬忍心而李楊之罪更浮於劉何以言之陝人夙富排外之思想時申逐客之令以爲非本地人不能治本地事外省人治陝陝人必無幸福可享故陳樹藩驅李根源李雲龍驅吳新田以予視之李根源吳新田尙無禍陝之事實所禍陝者即陝人之李雲龍楊懿耳當李雲龍之出師潼關攻取西安也守西安者爲皖人吳新田吳雖懦弱部屬尙有萬人負固堅守背城一戰勝敗之數正不可知乃吳新田不忍以一人之去就牽及全城之安危遂於寅夜間下令退却及天明部屬已完全讓出西安李追擊之奪獲槍械子彈甚多然而吳新田卒能全部退至漢中保全一部分勢力未始非存心忠厚之報

若李雲龍楊懿以陝西人而重禍陝西貽桑梓以萬劫不復之患倘能獲免天誅保全首領以歿吾不之信也陝西同胞試平心而論當城圍未解之時全城人民

對李楊作何感想追憶吳新田退讓西安又作如何感想須知禍陝者卽爲陝人非客籍也今馮玉祥到陝於陝西禍首李楊不惟不明正其罪而反代表國民政府授與陸軍上將崇銜是獎暴而勸亂天壤間尙有理性歟請問李雲龍楊懿果何所爲而守城或曰李爲陝西軍務督辦受中央之命來守此土治此民不得不與西安之城共存亡耳試問吳新田之督陝非中央之命吏乎何爲而驅逐之耶劉鎮華之野心勃勃正由李雲龍之驅吳有以啓之且現今國體五族共和之主國也寧有置主人於死地而徒守空城者乎

當劉鎮華兵抵灞橋時爲李雲龍者能戰則戰不能戰則和或則走耳乃一面促耆老議和一面調楊懿守城卒之西安久圍不解犧牲無數生命孤注一擲以爭一己之地盤是爲愛護桑梓造福地方之道耶彼劉鎮華爲河南鞏縣人對陝無情感猶可說也若李楊二人生於陝長於陝乃忍荼毒父母之邦是何心理李任軍務幫辦時卽已主持省政搜括人民膏血以肥一己其數已不少矣使其果有

心肝雖不能出私囊以紓省難而以陝財辦陝事保全一省元氣以示愛護桑梓不忍糜爛鄉人之意縱不免於爲個人保地盤爭權利誰亦不能以此罪李乃不此之圖今日向商會捐二十萬明日索三十萬捐自富戶者曰富戶捐捐自鋪戶者曰鋪戶捐既捐矣而又按警廳之收燈油捐按戶抽收無遺其代收鋪戶之房租嘗曰下不爲例而竟收至六次之多租房者如已出城即可解除納捐義務乃仍向房主責令代納否則送長安縣押追夫房主應得之房租既被公家代收已屬苦不堪言若再責以代人納捐誅求無罄非土匪而何耶既捐款矣又代收房租矣則所需糧秣應卽自備乃又責令人民按等納糧分一二三四五等其按第五等納糧者最貧之戶也尙需納糧一升富戶有納二石五斗者城圍食罄斗米百元自顧不暇庸有餘粒以納糧乎乃催糧派麥急於星火人民乃不得不自縊以求解脫何不恤民艱一至此極耶

吾校文牘張某家本平常夙無儲積專恃學校薪金以爲生活及城圍日久發薪

無望即使公家不派糧秣尚有朝不保夕之虞今竟派糧五斗繳納誤期拘押便至並罰銀六十元仍令如數繳納以爲違抗者戒張出於不得已賣房售田僅夠納糧得免縲紲之災而已圍城中鬻產業以償苛捐較平時變產之痛苦爲何如彼匪軍既捐款矣又派糧矣凡關於軍需物品如煤油清油洋燭棉花劈柴之屬無不按戶攤派夏季守城兵士之草帽均令商民供給亦苛矣哉人民既如此供給如此支應以理論之可以保身家財產矣仍不能也軍士三五成羣任意出入民宅以搜糧及查戶口爲名實則搜出糧食卽行充公若有金銀財物亦卽攘奪而去稍不如意輒以通敵罪名相加生命莫保夫人情孰不畏死而貪生故雖猝遭橫禍亦寧忍受勿敢宣布若宣布而報告之不惟無益反招嫌怨不免被其仇殺暗害圍城之中軍隊殺人曾不如雞犬敢自蹈白刃以快意哉

然此猶下級軍官或無知兵士所爲若楊懿者國民軍第三軍之第三師師長陝軍之副司令也乃竟多方張羅嚴加偵察某人家資幾何不動產若干卽擒而縛

之押於軍法處堂訊公然索銀若干鑿其慾壑方得釋放時期一誤即以軍法從事或梟首或槍決隨楊慙之喜怒而爲之有回人馬某西安灑金橋之富戶也楊慙向之勒索三萬已繳二萬矣仍不貸其一死又某翁河北之巨富楊慙之親同鄉也避難來省不啻自投陷阱各處隱匿仍被楊慙查覺拘於軍法處婪索大洋數十萬元某雖巨富而不動產均在河北城外兩軍相持又不能越雷池一步如此巨款何能咄嗟立辦不得已在城內向親友借洋十數萬元已繳納矣智盡能索苦難如數而楊慙以相差尙遠恣其陵逼某翁不勝箠楚之苦遂仰藥死其餘類此者頗多實難以枚舉

聞楊慙司令部之軍法處直是閻羅殿對富戶之刑訊與土匪被審無以異也暴戾恣睢達於極點慘無人道前所未聞堂堂師長且綁票勒贖旅長團長自亦尤而效之黑憲章爲楊慙之游擊隊司令殘暴不仁較楊尤甚軍隊之野蠻遠過土匪其軍隊駐紮何地其地所有之財物卽爲之一空如山貨店也醬園也海味店

也雜貨鋪也若有軍隊駐紮其中則貨物不勞自售駐軍卽爲代賣而本主一文不得也軍隊駐紮之處該處各種物品不准本主搬取所佔房屋屋主亦不敢重回故室西安被圍時凡飲食品或出售或運送均須倚賴軍人爲之保險不然中途卽被軍隊搶劫不惟劫掠商民糧物卽軍隊遇軍隊亦以衆欺寡強凌弱而竊取之二軍之糧三軍搶之三軍之秣二軍搶之其搶劫之事不僅限於糧秣亦不限於僻巷卽大街通衢之間軍械子彈之屬亦莫不彼搶此奪

予某日行至端履門見三軍馬弁二三人劫二軍馬弁之手槍斃其人而奪其槍揚長而去李雲龍以二軍人少亦不過事追究卽究亦無益也李之命令不能行於三軍楊以兵多將勇事事均佔優先之權青天白日之下有此無法無天之事予於西安圍城見之矣嗚呼西安同胞以圍城垂斃餘生備受軍人魚肉不膏鏹鏹卽爲餓殍幸免於饑仍不能逃於追呼與掠奪民命輕於鴻毛匪軍烈於水火夫聚多數猛虎毒蛇與良民同處一隅其搏噬蠱螫之殘慘尙堪問乎

第五章 軍隊之騷擾

驚弓之鳥聞聲而逃吾今日偶見軍人即生戒心者實於西安圍城時曾受若輩之欺凌故也今吾所謂軍隊之騷擾實就雙方言之李劉之軍隊無一不騷擾可謂兄弟之邦其政一也

初劉鎮華之攻西安也強佔民房安置軍隊人民有無棲寄之地不暇計之及久攻不下遂強拉民夫環城挖掘七十里之戰壕多者至二三道戰壕之中互相聯繫可以通行汽車戰壕之外皆壘土壁猶如土城五步一小孔十步一瞭口架槍以向城內射擊土城之下處處又築土房以爲兵士宿集之所如此浩大工程其役使人力之多可以想見至築房需用材料無一非拆自民房城內守軍亦然附郭各村房屋全被拆毀或以爲軍中燃料或去之以除戰事之障礙苦哉吾民之房宇既被拆毀糧食牲畜又被劫奪壯丁驅之掘壕老弱婦女又逼之供養或傳送軍食故其人非死則徙耳數十里內烟火寂然其喪家蕩產如此可慘孰甚詩

曰鷓鴣鷓鴣既取我子無毀我室可爲今之陝人詠之

鄉間之民轉徙猶可自由若城內人民備受軍隊蹂躪而無可逃避已苦無糧可食而迫令出糧供給軍隊甚至油鹽柴火均須居民代備沿門勒派輸送軍營不如是則坐以貽誤軍需任意科罰或派軍隊散入民家就食稍有粒米者何敢舉火只有與之同餓而已然孰能忍至終日不舉箸也或藏米之處一被其查覺即行全數劫去軍人亦即他適不復在此候餐矣糴市上賣糧者皆軍人也商民甫買之彼即跟蹤而復攫取之一轉移間又得厚值隨時隨地軍人均可擅入民宅以搜查餘糧爲名實際上罄其所有而悉奪之吾人携糧過市若一露出形迹途中即被搜檢攫劫陳浪洲遣其孫爲我送粟二升以應急需盛之以筐上覆以菜似可無他虞矣乃行至半途即被軍人劫去吾之家小正待此充饑聞之徒喚奈何而已

幾番起意出城避難復念及出城時須經守軍一度之搜索出城後又經圍軍再

度之剝削冬令嚴寒將難民之衣全行褫奪祇給留一套貼身之小褲褂在戰壕間停待一宿復索賄款每人十元既已交付而仍不放出吾校同人陸理成唐養愚吳碧柳王儒卿胡竹銘諸君皆躬逢其事者也彼五君之出城也事前非常秘密吾儕在危城中無一日不聚首清談以消愁悶王君與予尤非泛交其出城之舉事前向予一字未肯吐出及其離城以後吾始知之深恨不能附驥逃生懊悔萬狀今日思之猶不堪其苦楚也彼時內子嗔吾交友何以不可與共患難吾以死生有命勉爲解釋之王君出城終未達其目的在戰壕苦蹲一宿而歸方告予曰此行異常冒險非携眷者所可同行故不辭而別吾聞之亦加諒解矣王君陝西商縣人圍城時與予同釜共爨者四閱月嘗慨然相告曰苟能出城請兄携眷暫赴敝縣吾必爲覓房購米生活上無憂困窘吾亦曾擬如其言以脫此樊籠乃慮及出城時軍隊之騷擾寧餓死而不敢冒然輕舉

吾住西大之教務處既不納捐又不出糧無形之幸福較之普通人已享受多多

突然西大之圖書館尙被軍隊搜翻五次蓋有人報告西大圖書館爲人藏米若干石致令軍隊一再光臨其每次來搜吾常坐臥不安以吾於院內魚甕下藏米半斗以備不時之需倘被劫去吾家五口卽有斷炊之虞吾爲自己保險者以欠薪一載典當已空拉票者決不登吾門也城中之富室巨商亦嘗如楊懿之潛匿行踪頻移居處恐受軍法處敲索也然予雖未受軍隊綁索之苦確遭軍隊路劫之災十月初旬予曾同曾君人傑赴東關購買木耳二三斤回入城門時經崗兵明驗暗搜劫去少半予携有西大護照尙且如此商民更可知矣

又一日予亦同曾君赴東關購買紅白砂糖曾先回校予因託人買麥麩及油渣遂單獨行走入索羅巷見有荷槍而立之兵士二三名厲聲問曰爾何往携何物予曰赴友人處託買麥麩及油渣予所携者白糖欲以合油渣充饑耳該軍士哂曰我不信汝儕文明其貌綢緞其衣而食油渣必飾言也速將提包解開以備檢查及經檢查若輩見白糖外了無他物卽曰速將糖留少許與吾輩沖茶予不敢

違各與之少許則三斤糖已去大半該兵士猶曰汝欲買獄幾何油渣幾塊有錢若干望明以見告予察其色似起意劫財者正囁嚅間突來行人三五名代爲緩頰予此時如囚人之遇大赦卽疾馳以去此楊愨之兵也其無紀律一至於此若輩以守城爲利藪所在効死弗去西安卒以保全不遭劉軍之搶劫國民黨以此謂其有功於西北革命若就西北人民言之予則認李楊守城爲殘害西安之罪魁也

西安被圍時軍隊之騷擾達於極點亦無怪其然何也圍城八閱月之間而軍隊僅發餉一月有半所捐之款均被楊愨扣留彼不搶劫何以爲生至官佐等均已腰纏纍纍如果嚴申軍紀禁止騷擾若輩肯枵腹從軍乎吾恐有守城之決心者只楊愨一人耳雖然猶爲幸事倘使圍城陷落則守城軍隊臨去之騷擾勢必加厲而劉鎮華乘勝入城之饑軍視城中子女玉帛皆其征服地之所有物恐西安無噍類矣

第六章 街市之慘景

圍城中怪象千態萬狀不可不擇要描寫以便世人之觀覽而警軍人之迷夢全城封鎖內外隔絕市肆上實無交易之可言惟吾人日需食料不能或缺故糧市尙未停止因其來源遏絕於是糧價之離奇爭食之怪狀頗堪稱述請先言之

西安省城賣糧處所向有東西兩市粉巷爲東市橋梓口爲西市東市量糧之斗每斗計重二十四斤西市二十三斤每早六鐘後糧商齊集市中米麥及各種雜糧應有盡有一一陳列以資選擇經買糧者認爲合意卽商價值合則成交否則已既賣之後於全額之中提出百分之一二作爲介紹費卽俗所謂佣錢也使用之斗皆係長安縣署頒發量時祇以手拭平斗口二十四斤之斗時溢至二十五斤賣者多而買者少則價值平準市上恒有存糧此整批發售者也若零星購買卽由糧米舖買之須先議適用何斗二十四斤之斗一種價二十三斤者又一種價此種米舖均係整裝批來零星發賣者此爲平時之市況也

西安城圍八月斗米百元然而全城數十萬之生靈竟能食至八月之久毋亦令人不可思議初鎮嵩軍之圍城也僅圍攻東南北三門其西門並未封鎖車馬通行如故一閱月後方圍西門全城遂如鐵釜咸陽糧道爲之斷絕幸前此一月之中軍署疊令西路各縣輸入大宗糧秣以應軍用商民亦由西路大事運輸以濟民食西安糧市本有大宗之存儲又於此一月間輸入大宗糧秣故於陰歷三月初五日圍城斗米一元直至七月初間斗米纔三元耳七月中旬價漸增然僅至七元而止及秋節前後斗米已增至十二元矣此時工商均已歇業糧米鋪存糧亦已售盡各糧米鋪門前均貼有米價太貴櫃夥出城字樣所有鋪門均釘板下鎖此圍城後街市蕭條之情景也

司令部見此情形恐軍食受其影響急出佈告大意謂軍事吃緊需糧孔急如有存糧人家務各據實報告以濟軍需如有隱匿不報或以多報少者一經查出即行加倍懲罰全數充公凡報告他人藏糧者一經查實即以所得十分之一給獎

自此佈告發出後搜糧之事時有所聞挾嫌誣報以圖洩忿者日數十起釜底游魂爲之騷然約計搜出之糧日有數百石數十石不等如能悉數充公亦於軍需不無裨益乃軍人牟利其間今日搜之明日復售之搜一石者轉售八斗民間存糧有限軍人誅求無饜如之何能源源相繼也設城圍不解終有軍民交困之日且其收糧不論藏糧之家人口幾何全數搜去毫不顧念人民生活爲之稍留餘粒始也於大宗存糧之家搜之爲害尙不甚鉅其後細大不捐沿門搜括貧苦之家亦無倖免如無存糧則取其衣物代之貽害閭閻莫此爲甚即磨礱亦甚困難磨一次非有二三人守望者軍隊突然入室藏匿不及即代爲磨之矣如納費軍人爲之保險尙可安然免劫輸運時亦須軍人代運或保護始免危險此市民惶恐之情形也

當此之時一斛明珠不敵一斛糙米糧價之騰貴實爲空前所未有乃至有紀述之興趣者市上糧價忽於一日之間突呈劇激昇降之變化是也陰歷九月初間

糧價每斗已十二元矣李楊衛接有姜宏謨之密函忽於九月初十日率同所部出城決戰而糧價突由十二元而跌至五元旋由五元而漲至二十元請言其故省城人民自聞楊李出城決一死戰又有國民一軍爲之聲援前後夾擊必奏膚功神經過敏者咸以爲米麥不必存儲急赴市上糶之向之每斗售十二元者今則每斗僅售五元而尙無人過問在一般人士之心理僉謂西安解圍直指顧問事何必購此價值昂貴之食料欣欣然均有甦意孰知省軍出攻結果令人大爲失望糧價不惟未跌及次日敗兵回城商民希望斷絕戒備更甚已售糧者頓生後悔而斗米突漲至二十元矣一日之間價值疊增不已米麵每斤由五角而六角不半月即至五元油渣一塊亦由八角而漲至三十元西大街各會館門前所貼援軍住房條子人民皆視爲欺人之談司令部雖出佈告述及戰事如何勝利援軍已至何處而城內人民均不之信無病呻吟莫知死所此市民疑懼之情形也

街市上各鋪戶無不嚴釘其門緊鎖其戶迫於捐款不敢營業實亦無業可營街市開門照常營業者惟有鴉片烟館而已街衢之攤牀或賣糖食或賣衣物曾無一處之小飯攤賣馬肉者每斤一元圍而食者頗多予於某日行至東木頭市見馬肉攤上陳列之肉內有一塊狀極鬆懈而不似騾馬肉者價值雖稍公允每斤猶售七角食者噴鼻去而他顧或謂爲人肉亦未可知每赴街市必見死尸橫陳爲數不下數十皆係同時同地餓斃者也夜深時此輩死尸之臀肉即被人割去與馬肉雜煮之以賣錢餬口予自是寧忍餓死而不敢食市脯懼食人肉也餓殍徧野慈善團體幾無以盡其掩埋義務卽以席捲而埋之亦不勝其煩城門旣已關閉生者尙朝不保夕死者更無論矣隨時隨地掘坑掩埋狗即從而爬出噬之狗食人亦極慘矣而人食人可慘又孰甚耶此街市慘怖之情形也

第七章 守城之經過

劉鎮華引兵攻西安也其勢甚銳已唾手可得李雲龍佯藉和平期成會以老其

師暗結楊愨來援以爲後盾而劉遂爲其所給其實李楊之結合各基其利害之關係非真有共同之感情也前已略言之矣楊愨率部抵省後與李雲龍磋商防守結果李雲龍守南門衛定一守西門楊愨守東北二門攻城者東南爲重西北次之難民欲出城者亦惟東南兩面可以逃生西北二門則否而東南二門情形亦畧有不同南門守城之兵係李之部屬對於出城者尙不留難東門則楊之第六旅守之難民出城固不加阻止但既出之後不准復入耳

西安未圍以前曾有陝西陸軍模範團共計步兵三營騎砲工輜各一連軍官班一連爲數不下一千五百餘人教導團之性質一年半畢業授以軍事知識及西安被圍卽行裁撤官佐目兵願從軍者可以改編以守城之兵無多欲藉之以增厚實力也及城圍至一二月仍無解決希望省當局鑒夫人心動搖遂散布空氣謂井岳秀正率部南下援省以爲安撫人心之計楊愨原爲井之舊部今楊旣被圍謂井來相援亦復近乎情理自可取信於人其後井軍迄未動員遂又布告國

民一軍即將援陝當時城內人民莫之肯信因言井軍援省久之未能證實今又揚言國民一軍援陝寧非欺人之談乎

劉之飛機初來之日在城中大散傳單勸守城之兵自行投誠如携槍一枝來繳者每槍一枝給銀二十乃至四十元視其槍之優劣如何而定並謂城內人民必當竭力保護萬勿驚恐等語自飛機到後城內軍民莫不恐慌蓋恐拋擲炸彈身遭不測也李楊均出布告以安人心李之布告有曰劉用飛機散布流言本司令已選就高射砲手多名俟再來時不難將其射下楊之布告有曰蔣介石已佔領武漢吳佩孚退駐鄭州劉鎮華攻城不下窮極無聊特由鄭州商會借出破爛不堪之飛機二架並由汽車公司借用司機二名以供駕駛似此破爛不堪之飛機不難一射而墜落之望商民人等勿庸驚恐云云第二日第三日劉之飛機連續翱翔於空中每次必散傳單多張而守城之兵亦於飛機到時向空中亂發槍彈卒之飛機照常行駛初不因其槍之射擊而停止也向空放槍之流彈時有傷及

城內人民之事

國民二軍當全盛時代尙無飛機更何有於高射砲如無高射砲而僅以槍擊之有何效力徒耗子彈耳且軍人之有飛機者在北方爲二張吳閻在南方不過孫傳芳蔣介石耳普通軍閥尙無此項利器况鄭州之商會乎飛機機械與汽車迥殊非專門者如何可以司機若以汽車司機者即可以充飛機之司機未免輕視飛機之司機矣造謠欺人亦須近理白楊出此布告吾儕西大同人莫不非笑之並歎其幕府人才無識作此情理不通之布告竟敢謂秦無人也且一事捏造致令蔣佔武漢吳退鄭州之事實人亦視爲造謠難以相信矣

城圍日久糧價疊漲不已李思以官價而抑平之市價每斗六七元時官家勒定二元不准高抬市價以濟貧民用意未可厚非無如相差太遠糧商不甘貶價出售而又懼其淫威也遂潛藏其糧石遇有購者輒曰存糧已盡卽通融一二升亦不可得李雲龍濟民之意結果適以厲民豈其始料所及哉卒之需要者待用孔

亟遂不得不展轉託人仍按市價購之尙能得米爲粥是官價雖定而時勢仍不能履行徒覺多事自損威信耳自陰歷十月十五日市民請願後李已嚴令軍隊不准搶劫民糧有兵士趙文魁者仍在東關龍渠堡某戶劫糧報告軍警擒而殺之梟首遊行示衆此風稍戢

豫陝毗連陝中之苦力亦惟豫人爲最多自劉攻城後豫人卽大受嫌疑乃劉猶復潛派同鄉假借省城商民爲名進城作間諜事業事爲二虎知之殺其人而嚴偵其黨羽恐其復來也城內軍警徧查戶口遇有豫籍人士莫不再三盤詰非有舖保即被逮捕豫籍拉車夫及小販因無舖保而被逮捕者數達二三千人剝其自由奪其生業以致妻啼子號洵可慘矣時陰歷三月中旬也

陰歷七月間城圍日久解決無望不惟鄉間難民有朝不保夕之慮卽城內人民亦有與城俱盡之憂全城人民皆欲逃生知宋伯魯宋聯奎爲陝西之大老得其一言劉未必不放難民出城也衆情一致請二老函致劉鎮華劉之復函曰接奉

惠書具見維護地方爲民請命之盛意鎮華在陝多年與陝西人士不無感情自表贊同以副雅意惟李雲龍楊懿人而獸心天良喪盡不惜全城數十萬之生靈作孤注一擲之舉爲天地人神所不容耳倘能使李楊率部出城則難民出城尙有商酌之餘地等語復函被楊懿知之謂二宋通劉即欲處以死刑嗣經多數僚屬謂二宋名流物望所歸殺之無益適有損耳二宋險遭不測從此卽緘默不言矣

劉軍攻城屢次失敗攻其有備殊非順利遂仿曾國荃之攻南京挖地洞焉由城外掘至城內遠者十數里近者亦三四里費時勞工可云備至而皆功敗垂成每被守軍查覺擒其人而填其洞又等廢物矣

劉鎮華知地洞之不收效也遂又派兵詐降某陝人劉軍之連長也率其全部投誠於省軍繳其槍彈而散處之防其作內應也投降已半月了無詐降痕跡李始稍置信某日命之守城夜半卽引劉軍以繩縋之登城約二三十人卽將舉事被

查城之副官所遇斃其副官即開槍向城內射擊臨近有李之大本營在焉機關槍迫擊砲齊來防禦卒以衆寡不敵全軍覆沒詐降之連長被其生擒即行正法時陰歷八月間也

陰歷九月初十日李雲龍楊懿衛定一等忽議定率師同出南門衝入劉軍戰壕以取積極之決戰先是李雲龍之旅長姜宏謨駐紮省城西南咸陽屋鄜一帶及劉軍到後即行降劉俯首受編嗣聞國民一軍援陝姜又反劉投李其時援陝之國民一軍總司令孫良臣正在隴東隴南與張兆鉀孔繁錦相持不下急切莫能赴援姜率所部援助孫軍遂將張孔一併解決張兆鉀率領殘部先投劉鎮華後又投奉軍現充甘軍之總司令孔繁錦亦即棄職東歸姜宏謨既助國民一軍解決張孔又奉孫命爲援陝國民聯軍之先鋒隊已到西安城西之高橋鎮遣老嫗於鞋底內藏密函僑裝鄉民入城逃難其函約李定期出攻以收夾擊之效李即出兵乃劉軍之戰壕環城七十餘里高深皆在丈五以外不築浮橋誠難越雷池

一步大敗而回死傷甚多槍械子彈亦多損失李以出攻失利不再作出城之妄想矣

及陰歷九月初間姜宏謨又密函陳李略謂援軍之兵力已有馬鴻逵孫連仲孫良臣方振武吉某等師爲數不下六七萬人前鋒已抵大白楊地方距省纔二十里無如劉軍堅守壁壘攻之難操勝算請省軍攻其前援軍擊其後功成指顧間耳李楊衛得此密函認爲時機已至遂於九月十一日帶同所部作背城之戰守城之兵僅留二成其餘盡以出城應戰破釜沈舟以示決心向劉軍戰壕猛力攻撲不數時間居然衝過劉軍之戰壕二道將抵大白楊戰至半夜劉軍忽似不支向後退却李楊之兵有恃無恐追蹤前進卽佔領大白楊至此而與援軍仍不銜接其氣甚怯而勢又甚孤實則劉軍之敗非真敗也詐退以誘之耳迨劉軍反攻壓迫而至李楊孤軍難支傷人無算輜重亦被劉軍奪去又大敗而歸

當此時也李雲龍衛定一見人民之困苦糧食之稀貴生機之窮蹙死亡之悽慘

皆由守城有以致之使守城而有自拔之日猶可說也今出城應戰一再失敗城內現象不忍目覩援軍又可恃而不可恃死守殊無意識且爲人道計惻然不安曾與楊懿商議退却之策此可謂李雲龍之天良發現也詎楊怫然不悅曰守城已逾半載援軍將臨城下萬無半途棄城之理今若棄去則前日死守之謂何士各有志不必相強二君畏難請即退出彼劉鎮華豎子耳頓兵堅城七閱月而不能下其氣衰力竭可知矣我楊懿即殺至隻身單騎亦必力守待援如天不絕我終有成功之一日頭顱可斷此志不可奪也言之泫然泣下哭不成聲

初楊之來守危城本出於李之請求今撤退之議不自楊而自李轉爲楊所阻李亦懷慚感奮卽拔劍指天誓曰前言特視君堅忍何如耳君既如此不與同患難者有如皎日從此李楊感情彌臻融洽非第三者所能離間之也自楊決計守城之言宣出後一般人民未知何時脫險痛恨刺骨竊竊然私相咒曰吾儕父子不相見兄弟妻子離散壯者散而之四方老弱轉乎溝壑皆楊懿有以致之若長此

困守將見全城生命與楊懿同殉也斯日曷喪予及汝偕亡此時予亦作斯感想其守城之爲功爲罪姑不具論吾儕爲切膚之痛亦不暇計之也楊懿亦知力守孤城衆怨所集遂嚴密其居處潛藏其行蹤以防暗殺今日宿皇城明日宿廣仁寺至後日又下榻於別處甚至一日數遷雖其侍從亦不之知其愁苦如此李雲龍雖擁總司令之名而實際權力已潛移於楊太阿倒持授人以柄爲楊懿所挾制假其號令便宜行事傀儡自居如在狂狴自由喪失殆盡其惱悔幽怨之情不可言喻難民出城後卽以此情報於劉鎮華劉認爲絕好時機遂以飛機散布傳單略謂西安之糧絕矣人民之困苦艱難達於極點矣李雲龍倡議退去尙有恤民艱苦之意其罪猶可末減惟楊九娃（楊懿別號）罪大惡極天良喪盡度其居心必使全城生靈殄盡而後快誠西安人民之公敵也本總司令爲誅此巨惡以救民水火計已儲款六萬元以待如有擒獲楊懿而生獻之者必如數以賞之以爲此單既出必能離間二虎之感情（李號虎臣楊號虎城俗呼李楊曰二虎）使

彼自相殘殺已則收坐漁人之利乃楊仍冷靜處之屹不爲動部屬亦不離貳李衛更不敢單獨出城以自取危亡蓋李雲龍倡出城之議後楊曾對衆宣言我之固守西安爲國家保西北之半壁爲桑梓保地方之安寧願出城者不論兵民果非携帶槍械悉聽其便若有軍隊出城須先將槍械完全交出方可放行此無異對於李衛特加警告李衛若單獨出城非惟舊有之勢力不能保存即身家性命亦在在可危此時自顧不暇遑恤民艱遂決然與楊守城到底於是劉鎮華傳單之效力既等於零不惟妙計未酬嗒然若喪而其久攻不克智盡能索之弱點亦不啻自行暴露矣

先是圍城兩閱月後李楊見非雖云來援而迄未證實遂又潛派幹員僞裝難民出城逕赴綏遠五原求援其時國民軍已由南口退却集中於五原矣李楊請援之條件有曰祇要驅逐劉鎮華則陝西之一切財權軍權悉聽一軍支配本人概不過問國民軍會議結果決定出兵由五原入寧夏而蘭州而陝西關中地盤唾

手可得失之於南口而收之於關中屆時如有機會不難東出潼關與山東諸侯爭雄長也議既定遂由五原開拔閱五月始入陝境蓋在隴東隴南解決張孔頗費時日及抵西安附近姜爲前驅聲勢異常浩大猛力向劉軍攻擊劉親赴前線指揮一切殺旅長二員團長以下軍官四五十人始轉敗爲勝內外夾攻皆不收效李楊已無望矣而劉以久圍西安迄未能下兵疲師老已有敗象又殺旅長以下軍官四五十員兵心亦已搖動及援軍再次來攻李楊又出城相助劉自知難操勝算遂自動撤兵西安守城之經過於是乎告一結束矣

第八章 解圍之由來

西安城圍八月斗米百元居人槁項黃馘日夜翹望圍城之速解庶得更生固無論鎮嵩軍之攻入或國民軍之援救祇求其能解圍他非所計也卒得馮玉祥之國民一軍前來援解人心欣然若宣告大赦不知者必以爲國民軍與鎮嵩軍有如何劇烈之戰爭國民軍之勝利必有如何緻密之戰略精銳之利器馮玉祥之

所以能解圍者必其有如何優厚之實力足以壓迫劉鎮華或以其能得陝民平日信仰之故而使劉鎮華退避三舍者皆非也

就圍城之主觀言之諸說皆屬非是若就客觀言之劉鎮華之失敗所由來卽西安解圍之所由來也蓋天下事常勝於所懼而敗於所忽劉鎮華之圍西安正國民第一軍在南口敗創之時劉鎮華斷其必無餘力援陝故曾分兵各地城池被圍者亦甚多關中道所屬如咸陽高陵三原等縣莫不被圍或三五月或一二月不等國民一軍入陝沿途接觸屢遭挫折士氣實已不揚初不信其有援陝之能力及解圍之希望也城內陝軍屢次出城攻擊未嘗得一勝利遂睥睨一切愈益矜驕語云輕敵者必敗馮部之馬鴻逵率騎兵四五千人由南山繞過西安逕攻臨潼使劉首尾不能相顧劉出於不得已遂自動撤退此劉鎮華失敗之一大原因也

再此次劉鎮華圍城所爭者督辦耳而抵死不肯相讓者李楊二人也彼此爲爭

踞地盤全城人民何辜慘遭空前禍難已屬冤痛之極彼平和人民欲出城逃生斷無深閉固拒之理而劉鎮華竟不許放行不知其意何居其各縣之已歸劉有者亦不知加意撫恤聽其部屬騷擾無能禁止民心因之而失紅槍會因之而起即無援軍之來攻劉已有敗亡之兆適有馮玉祥來援劉遂不能立足於關中矣劉鎮華之攻西安環城挖七十里之戰壕高一丈五尺寬二丈外築土城以資掩護李雲龍衛定一縱有百萬之師亦難出城一步不過此種塹壕之修築皆係對城內而設防非對外也若攻其背則無可掩蔽鮮不立敗故馮軍自其背後擊之惟有全軍引退爲上策耳此戰略上設備之不周亦其失敗之所由來也至劉軍之飛機爲數僅二架少而且小僅可散放傳單不能作戰自屬無關乎重輕茲亦存而不論惟馬鴻逵拾得劉之飛機一架述之可爲談叢十一月二十七日劉軍已撤退而飛機猶在西安附近飛駛比至臨潼距西安已五十里矣而司機者突以購物停機物甫購畢馬之騎兵追擊至此見市面停有飛機而無司機者兵士

數百名圍而異之司機者見係敵軍亦卽棄而他適飛機遂爲馬所得矣

第九章 解圍後狀況

西安解圍之日我輩久困城中消息隔絕初不知其事也晨間予猶復赴鬼市售賣衣物及皮衣甫賣畢卽聞有城圍已解之說市上米麵之價仍舊未跌予尙以解圍之說係省軍所造空氣藉以安撫人心未敢深信嗣訪青年會總幹事張亞雄亦云然街上行人莫不欣欣然有喜色也予疾行回校早餐用後卽赴南門窺探真相途中遇王兄翰芳（西大論理教授）亦正查察城圍是否已解因相與偕行至鐘樓附近卽聞人喊馬嘶馳驅東出所著軍帽係輓頂式迥與省軍不同約有馬隊二百餘人其兵士風塵滿面軍衣亦皆污穢不堪一望而知爲遠道而來者詢之路人始知爲援陝國民一軍馬鴻逵之部下由南門進城又出東門追擊劉軍者也予至是始信不必出城調查遂與王翰芳分道而去予急赴粉巷購糧每斤已跌至一元有奇矣不數刻間卽由一元而五角矣鄉民之負裹進城者已

充塞於途矣吾輩從此可免餓斃之憂精神上之愉快不能形容此城圍初解時羣衆歡悅之狀況也

西安國立學校僅一西北大學有文理預科各三班法科專門部工科專門部蒙文專修科國學專修科各一班辦理雖未盡善盡美然而規模畢具無難促進也西安被圍時精神上固較爲散漫而事實上初亦未嘗停課及國民軍入城（李雲龍雖掛國民軍招牌而事實與名義迥殊一軍）而該黨領袖如李瀚章趙爾鼎李登雲李百齡等均主張取消西北大學改辦中山學院使陝西最高學府完全成爲黨化以爲各校倡西大師生三百餘人入國民黨者僅百分之二三其餘多抱超然宗旨不偏不黨以研究學問爲己任也又因經費不足人才不足遂於開學之始僅成立三班一爲軍事政治班二爲黨務組織班三爲農民運動班三個月畢業伙食由學校供給其所造就者革命人才也宣傳人才也並無深造學問精研文化之意旨數年慘淡經營之陝西最高學府一旦掃地可爲痛惜者也

省城之省立師範一單級師範一第一中學第三中學女子師範女子中學第一職業第二職業共八校現將兩師範併爲一處兩中學併爲一處兩女校併爲一處兩職業併爲一處以省經費至其教育主旨如何雖不得其詳以情度之當不外乎黨化此西安學校之現狀也

最可異者西安城圍甫解鼎鼎大名勞苦功高之楊愨忽然潛匿失蹤是也說者謂馮玉祥接有匿名指控楊愨之案件甚多楊知之恐有不利遂即穩匿不見此說頗爲近是究竟內情如何未敢臆斷亦不必推測也其軍隊亦於城圍解後陸續開赴蒲城一帶攻擊麻振武矣（馮玉祥屢電奉邀于右任兩赴河北請楊出山楊無表示）李雲龍因駐陝總司令已畀于右任已則僅任爲國民軍聯軍第八路總司令且奉馮玉祥之命率領所部開赴商縣藍田等縣衛定一爲第十二路總司令亦率所部開赴西路興平武功扶風醴泉一帶此爲請援時預定之條件今切實履行耳故李亦不能有異議也省城駐防軍隊惟有馮玉祥總司令部

之衛隊師韓德元而已韓爲衛隊長兼任西安警備司令凡如衛戍司令憲兵司令所有職權皆歸屬之西安省會警察廳已取消改爲西安保安局局長亦以韓兼之維持西安全城秩序保衛西安全城治安東區警察署收爲第一分局南區改爲二分局西區改爲三分局北區改爲四分局東關警察署改爲第五分局署長均改爲分署長冠以保安字樣馮之治軍紀律最爲嚴明西安警備司令韓德元亦能認真辦事察詰奸宄不顧情面曾有李雲龍之參謀宋某霸佔民妻經其夫呈控警備司令部李聞之亦曾爲之向韓緩頰韓不爲動即派兵嚴擊次日審訊屬實即行槍決其軍隊對人和平向無騷擾之事以馮軍之紀律比之陝軍奚啻霄壤此國民軍駐紮省垣之狀況也

馮每晨五鐘起牀辦理部內要公或對員屬訓話數年如一日其出入司令部或因公外出也向不禁街亦不多帶馬弁隨從之兵三五人而已馮亦戎裝不著肩章不知者則以爲普通之軍官耳無論任何人士祇要有事赴司令部請謁馮無

不立時出見傳達人等亦無代爲擋駕之事甚至鄉間愚夫愚婦請謁亦決無不見者此馮玉祥之籠絡民心可謂深得其術者也

至由甘入陝由陝入豫沿途均係馮軍駐紮與商民交易亦皆公平糧秣雖係採自民間而有鄉正爲之代催按戶均攤務得其平亦無軍隊擅入民宅之事惟河北南山一帶皆係二三軍駐紮雖經馮玉祥嚴加約束極力整頓維持軍譽改良軍紀之事不啻三令五申無如言者諄諄聽者藐藐總不忘其慣習綁票勒贖之事昌行無忌馮雖知之亦莫如之何此陝西省外各地軍隊之狀況也

陝西原分三道省城爲關中道歷任督軍權力完全行使之區域也南爲漢中道爲陝南鎮守使所轄地受護軍使吳新田之節制者也北爲榆林道陝北鎮守使井岳秀命令行使之地也一省之中形同割據軍權既不統一財權亦隨而歧異不惟全陝財政不能統一即關中一道直轄於督軍勢力之下者亦何嘗統一如潼關監督印花稅處財政廳菸酒公賣局禁烟總局等收入機關共有五處而各

處駐軍對於稅關局所莫不視爲一己之外府擅自提款省城直無分文之進項亦莫敢誰何也省長及各廳處長公費薪俸積欠數載無法清理其發款手續由財政廳撥給一紙印文領款員自向各縣提取縣長如與提款員有私人感情則撥文即爲有效外省人士卽執有財政廳之撥文而無處可以領錢徒咨嗟浩歎而已

馮玉祥到陝後與于右任磋商結果組織財政委員會凡上列五大收入機關統歸財政委員會管理委員長卽甘肅省長薛篤弼對於財政頗加整頓各處駐軍公餉由財政委員會支給不得逕向收入機關任意提取各收入機關均由財政委員會派員接辦不得由駐軍逕行委人駐軍迫於馮之威勢不得不服從之去歲陰歷年關各軍迫索軍餉不已馮玉祥無法應付對此災後餘生不忍再事苛索曾於舊出之富秦銀行鈔票上加蓋總司令之章並註有不兌現字樣發行三十萬元各軍兵士每名發給一元而已此項鈔票流通市面旣不能兌現商家

又不准拒絕於是行使非常困難予此次回京西大會給商號期票一張至期即往提取乃十分之七爲富秦銀行不兌現之鈔票予以路費須於路上用之此項鈔票在省垣市面購買物品尙難行使一經出城即成廢紙更何能作路費耶然以馮之命令公私通用不得拒絕予何人斯獨敢違之不得已仍將原條帶回交還學校當局設法變通方得成行回想此三十萬元之不兌現鈔票雖曰爲數不多而劫後商民又受累不淺矣

此外可以兌現者爲西北銀行之鈔票然亦限於票面註有陝西字樣者每日上午十時至下午三時爲兌現時間過時即不兌付矣陝西行使現洋向以袁頭北洋站人三種爲正牌大清造幣湖北爲外牌同屬國幣而價值相差甚遠本爲無意識之區別而西北銀行兌現時不論正牌外牌摻雜兌給不准挑剔不准拒絕此種辦法固屬正當然該處市上既有一種特別習慣若未出有變通條告則兌款者不免受一部分之損失矣此陝西現在之財政狀況也

陝西自吳新田讓督後孫岳爲軍務督辦李雲龍爲軍務幫辦省長一席雖爲中央特任之劉治洲而行政上一切用人皆由督辦主持省長不過承轉耳

西安商民在圍城時備受捐搶勒索之苦歇業者不可勝數現在城圍既解各鋪戶雖有開門營業者而元氣已大傷恐十年內不易恢復城內之現銀現洋全被楊彪滿載而去幾如空城大商家均因時局靡定金融不穩商業不能進行仍持觀望態度所開門者皆係小賣商資本無多也如中國銀行自立晉乾坤泰等均行停止營業匯兌莊無一復業者郵政局入款均被陝軍提盡于右任復於郵局加派郵務監督一員郵局有所收入即行提去以是郵局亦行停匯外間有錢欲匯陝者及陝中有錢欲外匯者一時均完全停滯陝商運用不靈坐失信用與機會貨物亦不能輸進市面仍未回復舊觀此陝西之最近工商狀況也

陝西婦女向守舊道德嚴內外之界重男女之別自國民黨入陝後青年女生集會結社創陝西未有之局馮軍到陝國民黨鉅子于右任爲駐陝總司令極力提

倡婦女解放會開解放大會一般女生熱心黨務競談解放結婚離婚絕對自由婦女再醮亦成普通觀念較諸昔日其解放之速真不啻一日千里矣此西安婦女之最近狀況也

第十章 結論

秦據百二山河進可以戰退可以守俯瞰中原有高屋建瓴之勢中原若有戰事勢所必爭夫人知之吳佩孚東山再起重入中州其勢尙微河南地處中原四通八達得之不難失之甚易爲充優厚實力計乘國民軍敗衄之餘出兵先取關中誰曰不宜惜其膠執已見用人失宜耳夫秦人素喜排外其逐客也沿爲習慣前已言之矣爲吳氏計宜迎合陝民心理派田維勤入陝田爲陝人用兵亦不在劉鎮華下歡迎者豈止陝民而已哉李雲龍楊尨衛定一等亦極信仰而推崇之田果率師西指李楊決不守城早即拱手讓之矣西安旣得然後分兵入甘其時國軍南口受創已不成軍距甘尙二千餘里守甘肅者僅劉郁芬之一師耳何能

當此乘勝之軍况有孔繁錦張兆鉀可爲內應甘省五馬與馮又不甚洽吳軍若至彼輩勢必響應不惟得陝易即圖隴亦不難也陝甘既得則軍聲大振內部複雜之軍隊當然立歸統一南控湘漢西震巴蜀陸讐水慄不惟武漢不至淪沒卽蘇浙皖贛亦當拱手聽命彼黨軍伏處粵東一隅豈敢北向窺伺哉雖不敢遽謂統一中國斷不至英雄末路如今日也試推吳之心理不用田而用劉鎮華者必以劉曾任陝西督軍省長多年情形熟悉且其舊部之在陝者尙多爲之前驅可不血刃而定關陝故決以豫陝甘三省剿匪總司令畀之藉收駕輕就熟之效未始無一部之見地無如劉鎮華在陝多年民怨甚深前被陝人排斥而去今復入陝是觸陝人之公憤而予劉氏以復仇之機會其僨事必矣吳氏陝事之敗與其歸咎於劉鎮華毋寧自悔其用人之失當然而晚矣

就劉鎮華論之既受吳氏寵命收撫陝甘二省剿除國民軍責任何等重大考其引兵鼓行而西也由函谷入關中克潼關下二華佔渭南據臨潼其鋒甚銳所向

無敵不數月間已兵臨西安城下城中李雲龍不過三千人其氣已奪如率師逕入垂手可得策之上也何至圍城八月師久無功耶夫陝人夙性狡展又思排外與劉復無好感劉氏在陝多年甯不知之既直接爲個人爭權利間接爲吳氏拓地盤則陝西耆老和平會之提議應加詳察以防李雲龍之利用最妙者限李雲龍於二十四小時內撤兵出城和平會當無異議苟有愛民之心不妨入城之後加意撫卹何必靜候和平會之磋商延誤也李雲龍果有別種作用試問耆老赤手空拳何能制止乃一面往復和議一面將攻城得力之麻振武調至後方以表示其愛護陝民之意臨時換防乃予李雲龍以莫大之機會何其失計之甚也如恐麻振武軍無紀律入城擾亂秩序不妨以嚴令督之重金獎之一草一木不准妄動麻爲功令重賞計何敢即發現其匪性也計不出此一誤於換防再給於和平會坐令李雲龍外引楊鼈入城共守遂功敗垂成矣更讓一步言之儻劉鎮華於城圍之後先留一生門以爲李楊之去路並於其去路遠設伏兵再設法離間

二虎之感情李楊結合未久不難從中破壞然後虛張聲勢以攻之彼如受我威脅而逃走遇伏即成擒矣彼如堅守則應變更戰略或誘其出戰而敗之誘之不出惟有重圍以困之久必屈服但圍困最須注意二事一須先散傳單警告城內非戰鬥員之平和人民於若干時間以內迅即離城以免玉石俱焚二須遠絕其外援若其援軍逼近則危矣此二事辦妥然後用大砲向城內轟擊並令飛機拋擲炸彈不出四十八小時城上必高插白旗此皆策之次也乃劉鎮華之圍城也未一月間即將四門全行合圍令其有死守之決心復禁阻城內難民出城其附郭各地已佔領者不知加意撫卹反聽其部下騷擾鄉民紛紛入城逃難甚至傳達消息如援兵已至某處劉鎮華戰略何如以及蔣佔武漢吳退鄭州等事圍城中無不知之斯亦奇矣姜宏謨原爲劉之舊部劉此次入陝彼即投降願受改編孰知姜宏謨心懷叵測竟効忠於李雲龍爲其引導援軍深入也使其將姜旅解散一面分兵略地以武力解決西路各陝軍馮軍來援於千里外即於千里外堵

截之援軍久無消息守城者亦不死守也顧馮軍業已臨近方出兵以擊之雖經幾番勝利而究歸於失敗倉皇退走捲旆出關真下下策矣予非軍事家何敢侈談戰略試觀劉鎮華入關後軍事種種措置無不令人發矇安得不敗馮玉祥於南口失敗之餘已不成軍而能保甘肅且得陝西者豈非幸運歟

李雲龍楊懿等以數千疲敝之衆當劉鎮華十萬乘勝之師竟能保全西安使劉氏功敗垂成不敢逗留關中殊屬出人意外吾人若持成敗之見則李楊似勝於陳嘉謨劉玉春輩遠矣且功成不居退師遠引其高尚恬淡之風尤爲當代所罕見豈非一時物望哉彼國民黨人推其此舉爲大有造於西北命革從而盛稱其豐功偉烈猶恐未足以盡之雖然果有持此以頌揚於李楊之前者彼必垂涕傷心而不敢自承其拱手以讓西安實爲其痛史非出以心願也何以言之李楊併力守城非有共生死捍患難之誠心及有愛於西安人民也蓋各爲其野心所驅使以爲劉鎮華苟力竭潰去則以姚萇李茂貞自居撫有三秦無異關中王耳孰

料劉鎮華亦挾此野心而來大有不得止之勢李楊至此方知奢望難償不得已而思其次急求解圍以自全意謂與其去而讓劉畢竟難於自保毋寧乞援於國民軍尙可以革命自豪又知非獻出地盤不足以速其赴援故決計忍痛讓之雖暫失地盤亦足以向劉鎮華一吐其氣所謂鵠蚌相持漁人得利也

何以知李楊之志仍在地盤也李氏召楊時動以權利並未許以地盤而總司令名義仍李自任之楊氏入西安後即將所有軍權財權攘爲己有其斂財招怨之事則以總司令名義出之被李以惡名而自享其實利二人之情昭然若揭方圍急之時李楊迭次出城鏖戰亦各具隱衷楊慙狡黠每戰必推李率部前驅己爲後盾彼勝固可喜敗亦良佳而李旣擁總司令之名未始無任楊以前敵指揮之心無如楊乃已所召來究屬客體故義難出此只得身先陷陣功成則聲勢自大屆時可下逐客之令詎屢戰屢敗李之部衆子彈傷損獨多於是李欲另闢蹊徑以償其願迭議棄城而遁楊則始終堅持挾制之此二人之隱情也迄解圍之日


彼二人雖均未遂初志而楊愨則實力無虧飽載逸去功不與聞罪亦不屬有機則捲土重來真譎矣哉李雲龍則名實俱非且須聽馮之命率其殘軍往驅吳新田於漢中爲人作嫁勝則歸人敗將自滅夫李固不足惜而馮玉祥尤譎矣哉若時過境遷李楊對劉之目標無存徒感馮軍紀律之拘束匪性難遏野心復萌追念前此苦心孤詣嬰城固守之謂何結果爲人犧牲當然深自懊悔極生怨怨積生忿勢將以馮玉祥與劉鎮華等量齊觀共起而斥逐之則陝禍復作矣若輩豈知信義與愛民哉况馮玉祥又有何恩威於彼輩而足令其馴伏耶

至耆老宋伯魯宋聯奎諸公出爲魯仲連也原爲陝民請命詎其和平會徒爲李雲龍利用以緩兵而致失信義於劉鎮華圍攻益急陝民仍不免於塗炭其亦可以已矣之二老者乃又通函於劉爲難民疏通出路雖不失爲民之初旨而劉鎮華既因前嫌而見屏復引起楊愨之疑忌竟欲坐以通敵之罪置於死地脫非有人挽救不亦殆乎乃淺見者流甚或以陝人排外之心理致疑耆老之和平會難

免同情於李雲龍甘爲其製造機會而賣劉鎮華是以小人之腹度君子之心吾不願爲此深刻之論也特其在李雲龍勢力之下不能完全主張意志即有主張亦無力強制武夫以必從此則情理之常吾人應極端相諒耳

馮玉祥在本編中不占重要地位原可置諸不議之列惟西安圍城結果乃爲其所奄有是劉鎮華之攻無異爲馮氏當衝鋒李雲龍等之守亦即爲馮氏保地盤也於是秦隴連成一氣以爲西北革命之根據地北由寧夏通外蒙以直達俄羅斯東則俯瞰河洛進窺中原以遙應長江之黨軍於大局關係頗鉅馮氏儻能再起必自今日之得關中始可斷言也馮氏得陝之後其軍事上布置已如前述雖因軍實不充未能驟然東展然彼決非抱關而守抑將謀乘機進取也此時正以全力整軍經武統一財政無如軍隊多而濟養艱故對於殷商富戶捐目煩苛甚至一糧一秣無不就地徵發陝人負擔之重並不減於圍城之時所不同者從前李楊劉輩純以暴力強括行同盜匪馮氏則捐募徵取不用刑驅勢迫耳其爲誅

求無藝民不堪命實二而一也陝西兵燹之餘現狀蕭條差絲繁重民不聊生其物質上之殘破如此至其精神文明上亦將摧陷而廓清之代以赤色主義馮氏在陝既有待於財力之充實因暫停軍事之動作於是從事宣傳赤化鼓煽共產毒焰以實行社會革命之工作致令文化高民每風醇厚之關中漸被其蠱毒爲之不變四維蕩然人心將死太史公曰哀莫大於心死痛哉言乎人心若死國曷能存吾謂陝西物質上之殘破休養生息數年尙可回復若將數千年精神文明掃地以盡恐非四五十年所能回復蓋必待此一代染化心死之人淘汰淨盡勿令謬種流傳而後可也



附錄西安圍城詩集

壯歲詩一首 仿翹冠詩體
共三千字

吳芳吉

民國十五年丙寅五月二十一日爲吾三十生期時方困西安圍城生死
難料趁其苟安感而賦此天命未終應獲無恙儻有不諱此爲最後一息
天遣吳生鳴不平單騎冒險來西京於時吳生年方壯精神彌滿血洋溢私鬪連
年不解兵饑荒三月困圍城奇冤無盡人無數明知此身難保不合死吞聲家書
三嗅虔鎖鑰詩草百篇秘囊橐危邦敝俗付誰收蓬鬚萍梗任飄泊勇士常思元
首志士不忘溝壑敢死直教萬難卻誓橫絕島踰沙漠一息猶存志不衰只恐吾
聲未遼廓嗚呼誰將此聲寄吾親友覺得抒游子情懷惡吾聞王道唐虞初殺一
不辜非所圖王道跡銷霸道出匡合猶存仁義敷不聞政令跨民主翻新匪道尙
崔苻崔苻此土尤猖獗當中兩虎聲赫赫恃城死守足風威二十萬人匪所憚言
和誰家子詞嚴義激烈通敵兩字冤悄然歸寸磔乃聞父老嗟此事何須說鳳翔

與大荔久圍常歲月糧盡馬驢空掘城霄遁穴彼輩實慣經嘯聚只移隄况復長
安縣歌舞豔西北兵家貴得此稱意肆豪闊沈酣殊未已吾曹豈遑恤命也怪將
誰欲嗔還結舌嗚呼聞之二豎左右無人爲盡忠也民寃之不展兮何以衆如蠶
也勢力而暗愚兮一念違之衷也衣冠與耆舊兮忍爲賊所庸也復羣小之助凶
兮幸其足幘幘也好枉道以求容兮惟是非之害公也遂禍患而無終兮民命其
真窮也猶說主義以媚賊爲功兮何心肝之不同也行者側目居者潛歎家無壯
男驅婦掘塹盜無斗儲當餐送飯大家饑十斤小戶錢半串沿門鞭撻急供應不
容慢南城東關情何慘淡盡室駐大兵深宵驚激戰堂前隨馬澠酒後索人玩闈
女逃不得蒼黃枯井踐兼旬失所依委棄復何算鼓角滿城頭黃昏歸鳥喚頃刻
難民集哭聲四五萬大旗陝西軍趑趄皆雄弁市靜騎官來寧能勞一盼城下朝
朝戰不休一聲礮響萬家愁巨彈如潮何處避各祈飛墮遠天頭東牆倒過西牆
陬大樹摧同小樹蹂却忘生命不如蟻過後相逢笑語悠鄰兒傷重獨罹憂治療

安頓兩無由幾家病院屍盈滿二寸桐棺軍扣留傳聞昨夜總攻擊困久如逢甘
露滴人人色喜幸城開戰危兵凶寧自惜初如駕舸出長江颶起天昏東海立浪
大舟輕不自主但聞六合搖磔法滋而汨汨同居婦孺不期集頭蒙襪被下露膝
各就牆陰自藏躲始著裙裾始顫慄黑雲嵬磊砢嚴逼天吳曠曠橫鯨吸檣摧帆
碎孤島遠成連凍死伯牙泣渺瀰兮無依猛掣兮霹靂路迷兮星隕舷傾兮蛇孽
下沈浸兮無底見海怪兮鱗鱗欲轉側兮惘恍惟屏息兮自戚逮東方之已曙乃
額手乎猶謐懾餘威兮未墜仍呀呷以澎灑惟吾民兮心悲死莫迫兮饑羸彈之
來兮有嚮饑不顧兮阿誰試出門而聞見何自殺之纍纍蓮花池喇嘛寺幾冤魂
此棄置夜啾啾兮聆鬼市見說市廳敷警崗禁人尋死不勝防徒教貧戶增歎惋
一死容易餓難當碑林翁媪氣倔強竟日兩口片饌嘗忍死不甘低討吃肚皮貼
背眼留睚北門雜市何攘攘好多兒女暗心傷最是方冠大學子垂頭街畔賣衣
裳繞郭油油大麥黃活我農夫數百莊自從開戰人盡亡過時不穫野荒荒兩軍

交恐敵人藏爭先縱火肆焚將騰空黑燄比城長深宵燭見心刀創噫嘻此景何
能忘闔獻不聞斯戾很更戕城樹供薪燼漢柏唐槐矜伐剖孔廟幾株太學遺奇
姿古幹世無偶峻嶽參差畏日寒長風嘯噏疑雷吼華蓋靈棲赤鳳來金莖氣作
蒼龍紐太學人才史册光不及此樹閱年久當年養老制明經天子幸臨丞相走
羽林驍衛肅橋門大呂黃鐘遲祭酒厯盡滄桑重鼎彝知還民國儕荆帚材大難
容復易摧放聲哭共杜陵叟獨有轅門樂事喧煙燈錦褥管絃繁侍醯中軍嬌粉
隊鳴騶半夜降梨園走卒馬夫皆得意蝦蟆陵與開元寺作戰爲民辛苦多綁票
括錢屬正義但云通敵肆捕捉但云藏奸私處治但云儲米當籍沒但云厝薪成
罪戾煌煌禁令槍空發街頭瞄準擊人戲嗚呼此時二豎何所希快意榮身知已
備此時兵士何所希敗降改編仍勢利此時羣小何所希祈禱異族頻接濟此時
長安百姓何所希恨不亡國逍遙爲奴隸問天天意醉如泥生我何不在山西晝
無搖役夜無警春有餘糧冬有衣十載不聞征戰苦千山喜見樹林齊胡爲襟帶

隔河水民命拋殘直犬雞生我何不在甘肅問天天意醉如穀省長廉能縣令清
婦人知禮兒童育兵民相助各熙熙道路平修何蹶蹶胡爲箭筈鄰關隴民命凋
傷永桎梏閻百川薛子良民之父母邦之光東西隆治今周召忍見雍歧亂未央
人選室邇思何已得吏張羣亦足喜張公一語銷浩劫千萬人家不枉死張公一
紙折強敵敗軍逃將全妻子張公一走顧恩私甘棠謳重豫人齒老成何可得循
良滂如此誰當惠我子遺民平居飽食出泥滓嗚呼黑水西河雍州之士百座雄
關四面開球琳琅玕鍾毓凝聚自古郁郁乎人才秦皇漢武隋文唐太建樹真宏
哉奈何俱逝皇風絕響而曠代不重來嗚呼古人顏色流星隕古人事業九泉冷
古人長逝詎吾憂憂我先聖先哲精神黯然隱憂我人心人道網維渙然泯政莫
大於惜民而擁兵者曰誰教汝民生此境恩莫大於六親而士夫者流杯水勺漿
難見憫彼文王忠厚之風夙淳淳秦穆同仇之氣固炳炳何以漸滅了無餘舉世
不聞此冥蠢今知五湖遼夏之禍中我深犬羊之俗汚我永二豎何足責民風有

由挺何以擷我蘭薰陶汝知識蒙屯何以鼓我瑤琴化汝天性殘忍何以搨我清
冷滌汝生活濁渾何以度我金鍼催汝夢中覺醒何以汲我銅瓶溉汝心胸誠悃
何以揚我鑿鈴挈汝坦途馳騁何以還我炎黃舊性根錫汝同情十萬頃乃羣小
之朋姦兮惟恐禍之不延知強敵之入主兮已身家之難全彼窮寇之負隅兮多
忌憚而不宣假名義以媵之兮頓旗鼓之闐闐謂圍城之愈久兮愈史冊之流傳
謂平原其有愧兮睢陽不得美前謂糧絕不足患兮家派兵以共餐謂兵盡不足
畏兮敗亦足以萬年逮搜括之垂盡兮賊意鑿而思遷謂民心之歸我兮寧棄之
而渺然逮屢而皆挫兮賊氣喪以闌珊謂南人之厚我兮即傾國而來援賊志以
益堅民願以愈難彌溝壑而無告比土芥而尤憐不敢側目况能揭竿一城生命
操汝掌間饑荒礮火虎豹重關屠城一死之慘未若凌遲待死之殘雖傾東海之
蕩蕩莫填此恨之綿綿憶昨長安春早寒食初度微雲太白天芳草樊川路走馬
章曲行歌灞杜徑入少陵之居花發玄裝之幕白雪疊乎千峰紅桃明逾萬樹溪

田若碎琉璃石瀨羣棲鷓鷯回望五陵平原如霧村烟喬木芝車碧輅似藉田之躬耕猶回首而相顧言採苜蓿喧集婦孺豆漿柿脯倦餘談助入門有酒酤上座得鮮茹雞犬之聲相聞桑榆之陰四布雖曲江之已渴仰雁塔之如故思漢唐之莫追覩民物之猶庶我來恨晚猶及良宵經茲戰亂赤土空郊搜錢毀炕拉夫熏窳無茅蓋而不揭無柴扉而不燒閭閻塵市迷荒塚溝澮阡盡戰壕餓殍滿街蒸疫癘炎風逆面嘔腥臊野犬食人肉白日向城嘯山頭無樹影灑落紅旗飄身非異族口說同胞果何故而煎熬復何辜而慘遭縱已往之不憾忱大難之遼遠自古危邦義不入遠遊何事此行役流彈當頭幾萬千餓糧隔夜無升斛多時生死難自知不死要無傷跼促藐弱得失甯在眼所嗟行道志不篤塵網日撓豪氣滅轉慙童稚意蓬勃垂髫猶記十齡時白沙江上遠從師阿父繫獄歸未得渝城探望屢奔馳還過江津省伯叔餽我百錢行路資念母勞家無甘旨小兔一雙爲母攜於時光緒三十二年端午日晨發江津城外鯉魚磯船開不及沿江趕淋雨

蒙頭無乾衣山長樹茂谷風冷濫泥滑路迷高低幾回顛倒復掙起傘破如瓜失
張弛孤帆已遠行步緊日暮難爲百里期龍門灘下浪如屋陰聲活活悽其心
憂路險愁攀涉傾筐縱兔揮之離豈知匍伏不肯去蟪毛縮耳意依依江雲黯淡
雨增急四山人絕獨成癡行行攜兔誓相共終日未食竟忘饑抵家昏夜母望久
訴罷所經笑還啼既不解樂亦無苦但有天真任天倪蹉跎及今邊年壯生涯起
落似層浪三十年間兩世人半享承半孽障反惜古人遭未得思可哀傷亦爽曠
復有良朋期亮節巖巖氣宇出人上只憐白髮老親心撫子成人無供養遙想茅
檐際碧桃已發花開門花下望不見兒還家春水肥鵝鳴南風甜果瓜知兒歡喫
取長養已盈筓牆頭兩橘柚枝葉何蒙麻吾妻常攀撫深藏碧樹枒去年枒上語
今夏歸莫差一年一聚首那知望已奢汽船鳴江潯郎影茁心芽忙忙爬樹望望
遠幾流霞賴有諸兒女娛情比我加驪也昨能步額髮應髻鬢驥諒益長跳躍
如鳴蛙今年學論語不知背誦佳正月寄書至塗墨蝻蠟沙告我暑期返路上莫

忘他洛陽買大棗漢口買搖車長沙買湖筆重慶買甜粬今朝父生日滿席定塵
譁隨母共遙祝壽酒又春茶家貧夜睡早牀上喚爸爸聲聲若在耳回應各天涯
兩地兵戈無時了蜀黔邊繫復騷擾自從春暮絕交通不知猜我猶完好一家憂
念甚倒懸人生那得如歸鳥圍城坐遣日驚心我愧甯居猶飯飽失學多辜親友
期吟詩何益國家老僥倖壯年鮮折磨皇天於我恩施巧安能坐視世風頹歎息
空悲徒自保當爲吾親繼志業當爲吾妻慰慍懣當爲吾兒達才姿當爲吾友敷
文藻當爲吾民作喉舌當爲先型述儀表當爲海隅蒼生導光明高燒人類靈犀
燼煩惱今年不得有明年明年不得後年早四五十無衰歇長夜漫漫會當曉

圍城

圍城客來少得閒欣自讀直忘窮可憂但覺日不足向晚出庭戶蕭蕭幾竿竹小
鳥宿相呼新篁萋以綠數日不流賞生理訝彌目萬物各競進竦然思自勗
時危人好嬉景促事翻暇常恐不朝夕沈酣窮日夜秦聲何幽咽美者璧無價傾

蓋復傾城狂迷不能罷道路多流亡幾人興悲咤西鄰老牧師惻然開廣舍冒死
扶創瘡彈丸紛四射賴君人道存含涕何能謝

春歸兵未已夏至疫相攻饑荒既煎急貧困復難容兼之盜寇滿去路渺何從噫
嘻天方憐五險迫心胸平生嘉道義及此應登庸何以戡五險飛駕乘六龍

隨遇不愁歸忘生不畏死四海既銷兵三秦禍無止戰亂奈我何安知非天使
我察吾民爲民鳴疾疢有友盡俠腸大節勵廉恥有婦諧同心百歲隨糠粃即死
應無憂高堂足甘旨

百戰

百戰西京半墓田田間昨日有人煙而今寥落重回首又是開元天寶年
鐵馬紅槍九市馳先生猶講漢唐詩祿山董卓都經見安得圖形與友知
送茶送飯誅無窮愛國愛民語最工南畝衰翁縲絏裏東郊少婦戰壕中
長街傍晚絕人行宿鳥啁啾夕數驚起視雲昏星月寂遙遙重礮打城聲

流彈飛飛撲面沙不知悲喜得誰家
飄風驟雨輕如夢總覺生民未有涯

石仲麟君之弟雨琴以斗米至

昔作梁父吟今當餓殍林干謁懷慙惴飄然來好音末世誰相念
斗米萬黃金欲將粒粒數持此見君心君心江海深我意愧蹄涔
親在不枉死偷生實下忱城空私得飽悲喜兩彌襟

長安野老行

朝逢野老不能言但垂清淚似煩冤
面瘦深知絕食久路旁倒傍酒家垣
向午歸來野老死頭枕樹根沾馬屎
半身裸露骨斑斑市兒偷去破襦子
黃昏重過血泥糊腿肉遭割作鮮脯
酒家人散登車去垣頭睽睽來饑烏

枹上成


行乞燈油無主人黃昏掩戶自酸辛
摩挲上榻祈眠早喜趁夢長見二親

民國十五年八月十七日糧絕

生命何渺茫此心日恬泰知到絃歌輟坦然歸上界

出門書所見

瘦骨何潦倒沿門不忍看救時情更急後死愧多端
惡吏猶催米秋風又早寒蒼天胡視聽使我盡凋殘



#6
448074

#6

448074